

Apocalipsis

Porrosht shuu daabo ochiraha uje t̄ir

1 ĩrmo nehe. ¹ Porrosht tatim Jesucristo par shuu tatim laabo erze kuche uje tyenij t̄ir ĩrmo nehe par uje shuu ochiraha, heke Jesucristo shuu ir anjel hno t̄ir debich uje iich otsii Juan. Wichi apóstol. ² Juan chichew erze uje Porrosht tata hn erze uje Jesucristo tyenij shiyokōr nehe. Wir uje Juan umo. ³ Ich om par ese uje ler ir ahwoso uje de asa hutita uje tata uje ire tyenij shiyokōr nehe hn ich om par erze uje ot̄er hn uje oshiyokōr uje erze ir ahwoso tata pork ich vej terihi ese ishirit̄ uje erze kuche t̄ir ĩrmo.

Juan chichew ana hutita.

⁴ Yok Juan. Tichew ana hutita tokosim erze Porrosht aabo uje ōr wee syete uje odechi hñimich Asia. Porrosht de hn shish dekite hn shish de nehe. Erze ichibiyo uje ōr syete odechi Porrosht ĩbita ikich. Sehe tuu Porrosht hn erze ichibiyo odosir olak hn oduhu olak aho kiis. ⁵ Hn sehe tuu Jesucristo takashim olak toy hn duhu olak aho kiis. Wichi shish tata uje ich ūru. Wichi webich os uje ikpokite tokolihi erze topo ōr ahir. Wichi nos rey ōr bahlut pisht uje ode nāhu ĩrmo. Cristo ich sahmūr pishi eyok. Wichi ir armista noshikite par ishi eyok hñitewihi Porrosht ahir. ⁶ Wichi uje shuu eyok weeta nohmira uje eyok Porrosht aabo hn shuu yomsaha ese obich uje iich otsii saserdote par yiyokōr ir Deych Porrosht ibiyo. Sehe tuu nos oteeychāha ire hn shish oduhu ire ma dich. Uje oniyokōr oduhu ilorz ich ih̄irtpa.

⁷ Ĕrlo yok. Cristo tyenij cheeshpo nehe tāra poōrc tokolihi ukuhurrza ehēt hn ihñimich hn nos oso oteychim. Erze uje ochiyuwa klabo ir hmekite tyenij omo toy nehe. Nos wir oso uje ode nāhu ĩrmo ich tyenij oyerh pork wichi taācha, per ich ma om uje taācha. ⁸ Eyok Irh̄ich Porrosht im: —Shi yok itso uu letra webich osht a hn uhurzosh̄t zeta.— Tata shuu itsorz pork wichi de hn shish dekite hn shish de nehe. Ir ukurbo deyo de.

Juan umo Cristo.

⁹ Titim olak. Yok Juan. Yok olak leshap pork yakishlo Jesús. Ich oso oloter yok toy. Yok Porrosht aap hn shish yok ewenta nos wir kuche

mihñūwo uje t̄ir yok itso olak. Oshiyeru yok ochibite yok ese hnimich uje iich otsii Patmos uje awit chipeēsa. Wichī itso karsel. Ochibite yok wahacha shi pork tanimirāha Porrosht ahwoso titim ōr Jesucristo. ¹⁰Domingo wichī eyok Irhīch ir deeych. Uje terihi ese deeych ich Porrosht Ichibich shuu tukunt uje yeēk chiilehetihi piyēr. Ir ahwoso ich jwertpa shi itso uje yeēk sobita trompeta. ¹¹Tatim yok im: —Erze uje tokowa owa nehe ich tyenij atsew ebite hutita hn asim asa hutita erze Porrosht aabo uje ōr wee syete. Ode erze duwo Efeso hn Esmirna hn Pégamo hn Tiatira hn Sardis hn Filadelfia hn Laodicea. Erze duwo dechi hnimich Asia.—

¹²Tomtis yok par takachim ese uje keytkēr yok keshi yeēkpo. Tokomo uhwirbe syete pur oro par otserūhu nampyon eeyo kal nohmir nohmir. ¹³Erze uhwirbe syete uje oro de hn yeēk iyehetihi ehēt wichī uje Porrosht shuu t̄irēt̄kite t̄ir ĩrmo. Ir ishuwo ich berzo hn ir ihirosh̄t pur oro uje de ir ĩrjorrza. ¹⁴Ir ak̄irt ich poro shi itso obeje wesho uje poro hn shi ĩtspo nieve. Ir ile eyhi shi itso jwekita yokōrt, ¹⁵hn ir hn̄ite shi itso bronse uje ich hūrpa. Wichī shi itso uje otsar ese bronse kipuut ehēt hn ir otich tokole ich hūrpa. Uje chiilehet ich ihyokōrak dich shi itso awit uje tāra kojach uushi ich jwertpa. ¹⁶Ir hmata waāchta porrzeebe de syete, hn espada tokolihi ir ahwo uje p̄it watak hn p̄it yet watak. Ir ile ich hūrpa shi itso deeych uje chihit. ¹⁷Uje takachim ich yok kayihi hn̄ite ah̄ir shi itso uje tikiti per ire chibite nahmita waāchta yok peeych hn tatim yok im: —Ye atila yok. Yok uu webich osht hn uu uhurzosh̄t. ¹⁸Ich yok ika. Antkite hn tikiti per ele ahle shish yok ika. Yok uje tiita uje otoy o kimiji ye otope hn ōr ichibiyo hno t̄ir erze topo ōr owich pork ich shi itso uje yabe de pahir par tiyokōr tuu itsorz. ¹⁹Heke atsew ebite hutita erze kuche uje amoko hn erze uje yesh de hn erze uje tyenij t̄ir ĩrmo nehe. ²⁰Tyenij titim owa uje siteēta erze porrzeebe uje syete uje amoko de p̄ihmta waāchta hn erze uhwirbe uje syete pur oro uje amoko. Erze porrzeebe shi itso erze Porrosht aabo ōr bahlūwo uje ode kal iglesya uje syete hn erze uhwirbe uje pur oro syete shi itso erze Porrosht aabo uje ode erze iglesya uje syete.

Porrosht aabo uje ode dit Efeso.

2 ¹Atsew asa hutita hn asim erze Porrosht aabo ōr bahlut uje de asa iglesya uje de dit Efeso. Atim ire on: “Wichī ir ahwoso ese uje porrzeebe syete de hmata waāchta hn dirkihi wir uhwirbe ehēt uje syete pur oro uje otserūhu nampyon eeyo. Wichī tata im: ²Nos tikiraha uje ahakōrlo. Tikiraha uje aslo p̄ibiyo ich ehnewlo hn ye moymlo erze p̄ibiyo. Tikiraha uje ye enthilope erze uje oshiyokōr mihñuwōho olak ehēt. Olak prowa erze oso uje ochii ir apostolehe par erahalo kimiji ūru hn eshilo uje ye ūrpe. ³Tikiraha uje shish kuche mihñūwo t̄ir olak hn

olak ewenta pork ye otiislo yokpe hn ye uhulo patim olakpe. ⁴Per kuchit de uje shuu tikitak olak. Wap ich ahmürlo pishi yok per ele ahle ich yërij ahmürlo yok. ⁵Sehe tuu olak eyucha uje wap ich ahmürlo pishi yok heke sehe tuu ahmürlo yokpo uhulo ilo wapni hn ahakörlo pibiyo uhulo ilo uje wapni. Kimiji ye ahakörlo uhulo itsorz ich tyenij titir olak nehe hn tuu olak weeta ye jukur shi itso uje tiyuhu asa uhwirbta uje oro per kimiji eeshlo ahmürlo pishi yok itso uje wapni ich ye tuu ilorzpe. ⁶Kuchit de uje ich om uje yesh ahakörlo, ich etaklo wir ör ibiyo erze uje ör iluu iich otsii nicolaítas. Yok itspo ye tahmür örpe. ⁷Ese uje tër uje Porrosht Ichibich tatim Porrosht aabo uje otakasho lawichihi lekitiyo ich tyenij shiyokör uje tata. Ese uje shiyokör itsorz ich tyenij serz hn tuu tew asa pohorrza eeta waa je shuu ör ikirit de. Asa pohorrza dechi paraíso uje Porrosht de.”

Porrosht aabo uje ode dit Esmirna.

⁸Atsew asa hutita hn asim erze Porrosht aabo ör bahlut uje de asa iglesya uje de dit Esmirna. Atim ire on: “Ese uje wapkite de hn uhurc ich shish de, wichi uje tokite hn ikpo tata im: ⁹Tikiraha erze kuche mihnúwo uje tir olak hn tikiraha uje olak losuhlaabo per ich olak ihir deyo. Tikiraha uje oso ode uje oshuu yewo ochiyuhu lahwoso mihnuwōho olak. Wir otata uje ör israel oso per wir ye Porrosht aabo. Wir shi weeta uje oshiyokör uje Satanás sahmür. ¹⁰Ye atililo erze mihnúwo uje tyenij tir olak. Erlo yok. Dyablo tyenij shuu ochimchaha olak yewo ör karsel par uje prowa olak kimiji moymlō Porrosht o kimiji ye moymlōpe. Tyenij oshiyokör mihnikīhi olak oshuu daalo dye. Ye moymlō yok nehech atilo hn tokosim olak premyo uje de pahir. Wichi uu olak ikirit. ¹¹Ese uje tër uje Porrosht Ichibich tatim Porrosht aabo uje otakisho lawichihi lekitiyo ich tyenij shiyokör uje tata. Erze uje oshiyokör uje ire tata ich otserz heke ye otir urhuta bahluta ehēt nehe. Asa urhuta bahluta iich yet otsii otopo.”

Porrosht aabo uje ode dit Pérgamo.

¹²Atsew asa hutita hn asim erze Porrosht aabo ör bahlut uje de asa iglesya uje de dit Pérgamo. Atim ire on: “Ese uje espada pit watak hn pit yet watak de ire ahir wichi tata shuu itsorz: ¹³Tikiraha uje ebuhulo ese owich uje Satanás sakaha. Tikiraha uje ye moymlō yokpe. Antipas ye lotiis yokpe hn shish sanimirāha pahwoso nehech oshuu oshuu toy olak dit ehēt uje Satanás debuhu. Uje oshuu ire oshuu toy itsorzni ich olak ye moymlō yokpe ¹⁴per kuche de uje ahakörlo uje ye tahmürpe. Olak yewo ode uje oshiyokörāha yewo itso uje Balaam shiyokörkite. Wichi sakit rey Balak par shuu israel oso oshiyokör uje ich mihnúwo shi itso uje chibite kojach erze israel oso ör ijich par uje shuu ör hnite hn ör kay. Wichi shuu otew erze kuche ero uje oshuu hn oshimihni ir porrosht kojano po hn shuu

oshiyokōr erze uje ich mihñūwo uje hnakirbo hn timcher oshiyokorīhiye. ¹⁵Olak yewo ode toy uje otsahmūr erze uje ōr iluu iich otsii nicolaítas oshiyokorāha ōr. Yok ich tikitak pishi ōr iluu. ¹⁶Moymlo erze uje ich mihñūwo hn eeshlopo ahakōrlo uje yok tahmūr. Kimiji ye ahakōrlo uje tahmūr ich tikirēt shichish hn tepyēr erze uje oshiyokōr uje ich mihñūwo tīra espada uje tāra pahwo. ¹⁷Ese uje tēr uje Porrosht Ichibich tatim Porrosht aabo uje otakisho lawichihī lekitiyo ich tyenij shiyokōr uje tata. Kimiji shiyokōr uje titim ireke ich tyenij serz hn tokosim ire erze ir poso uje shi itso maná uje sakisihi Porrosht ahir. Tokosim ire toy kojach uje poro uje ir iich ahle de. Nīhyok ye latik dīraha ese iich ahle, shi ese uje tokosim ire.”

Porrosht aabo uje ode dīt Tiatira.

¹⁸Atsew ebite hutita hn asim erze Porrosht aabo ōr bahlut uje de asa iglesya uje de dīt Tiatira. Atim ire on: “Porrosht ir Ijīt ir ile eyhi shi itso jwekita yokōrt hn ir hnite shi itso bronse uje ich hūre, wichī uje tata im: ¹⁹Tikiraha uje ahakōrlo hn tikiraha uje ahmūrlo yok hn ye otiislo yokpe hn shish ahakōrlo pībiyo hn olak ewenta erze kuche mihñūwo uje tār olak. Tikiraha uje olak ībiyo uje ahakōrlo par yok ich ma om je uje wapni ²⁰per kuchit de uje ich tikitakpa uje ahakōrlo. Ye ontilope asa timcharrza waa je iich otsii Jezabel. Wate chii ir profet yarīhi hn shiyokorāha pībiyo shuu oshiyokōr erze uje ich mihñūwo pisho uje hnakirbo hn timcher oshiyokorīhiye hn shuu elilo erze kuche ēro uje oso oshuu hn oshim ir porrosht kojano po. ²¹Tibite ishirīt par uje wate iim uje shiyokōr uje mihñūwo par shiyokōr uje tahmūr per ye nahmūrpe. Ye noympe uje shiyokōr erze mihñūwo uje hnakirbo hn timcher oshiyokorīhiye. ²²Ērlo yok. Tyenij tuu wate permpa hn shi de darpich eeych. Erze uje otorāhayē hōr wate timcharrza tyenij oym erze kuche mihñūwo hn oshiyokōr uje tahmūr. Kimiji ye onoym erze mihñūwo ich tuu ōr dospa. ²³Erze uje otsahmūr uje wate shiyokorāha ōr ich tyenij tuu ōr tuu otoy, heke nos paabo uje otakisho lawichihī lekitiyo ochiraha uje takachim ōr aho hn ōr eyuwo. Deeych yet nehe hn tokosim olak nohmīr nohmīr uje erzlo kimiji ahakōrlo uje om o kimiji ahakōrlo uje mihñūwo. ²⁴Olak yewo uje olak dechi dīt Tiatira uje ye ahakōrlope uje asa timcharrza tatim olak hn ye ahakōrlope erze kuche mihñūwo uje otata uje wir kuche uje kwestpa ochiraha uje tāra Satanás per shish ahakōrlo uje titim olakni heke ye tirok olakpe par tokosim olak ībiyo yewo. ²⁵Shish tyenij ahakōrlo erze uje yesh ahakōrlo nehech takaācha nehe. ²⁶Uje yeēk shiyokōr shuu itsorz nehech terihī uhurc ich tyenij serz hn tokosim ire ukurbo par tibey wir dihipo ich okihniya.

²⁷Wichi tyenij sepyēr yeēk uje shiyokōr mīhnik shi itso uje shuu kobit chishak chīra pyerit. Tokosim ire ukurbo shi itso uje Papa ishīm yok

pukurbo. ²⁸Tokosim ire kuchẽrk toy uje shi itso porrzeebcha bahluta waa je tokolihi deeych huta. ²⁹Ese uje tẽr uje Porrosht Ichibich tatim daabo uje otakisho lawichihĩ lekitiyo ich tyenij shiyokõr uje tata.”

Porrosht aabo uje ode dit Sardis.

3 ¹Atsew ebite hutita hn asim erze Porrosht aabo õr bahlut uje de asa iglesya uje de dit Sardis. Atim ire on: “Wichi ir ahwoso uje Porrosht Ichibich syete de ire hn porrzeebe syete de ire toy. Wichi tata im: Tikiraha uje ahakõrlo. Ebitlo uje olak ika per shi olak itso topo. ²Olak shi olak itso uje amilo. Erĩhilo uhu olak ukurboshpo. Uhulo ikpo ese uje sehe toy. Tokomo erze uje ahakorĩhilo Porrosht ile ikich ich ye ompe. ³Olak eyucha erze uje ẽntloni hn ahmũrlo. Moymlo erze mihñũwo uje yesh ahakõrlo hn eeshlopo ahakõrlo uje Porrosht sahmũr. Kimiji ye erĩhilo ich tikirẽt shi yok itso echikit heke ye erahalope waa orta uje takaashpo par tepyẽr olak. ⁴Oso sohmiramo ode olak etet wahacha dit Sardis uje ye oniyokõr mihñũwope. Wir shi itso uje ye õr ishũwo waresh heke wir tyenij õya yok nehe hn õr ishũwo ich poro pork ye oniyokõr uje mihñũwope. ⁵Yeẽk uje iim erze mihñũwo ich serz. Wichi tyenij iyãha lasuwo uje poro, hn ye turhũ iichpe uje de asa hutita uje õr ikirĩt de uje yelij nihna ire. Tyenij titim Papa ir ich toy hn erze ir anjele. ⁶Ese uje tẽr uje Porrosht Ichibich tatim daabo uje otakisho lawichihĩ lekitiyo tyenij shiyokõr uje ire tata.”

Porrosht aabo uje ode dit Filadelfia.

⁷Atsew asa hutita asim erze Porrosht aabo õr bahlut uje de asa iglesya uje de dit Filadelfia. Atim ire on: “Wichi ir ahwoso ese uje yelij niyokõr uje mĩhnik. Wichi shi tata uje ich ũru, hn shi itso uje tõhwa rey David ir yabe pork tyenij tibey israel oso õr hnimich nehe. Uje Cristo sitsẽr ese pwert uhurra ich nĩhyok yeẽk pwele shiyeru hn uje shiyeru ich nĩhyok yeẽk pwele sitsẽr. Wichi tata im: ⁸Nos tikiraha uje ahakõrlo. Ęrlo yok. Tokosim olak pahwoso par animirãhalo shi itso uje titsẽr pwert uhurra hn nĩhyok yeẽk uje pwele shiyeru. Tikiraha uje yẽrij olak ukurbosh per shish ahakõrlo uje titim olak hn yelij atililo erze uje ye odiraha yokpe. ⁹Ęrlo yok. Erze israel oso otata uje ochii ire Porrosht aaboho per shi oshiyokõr uje Satanãs sahmũr. Wir shi otata lekushii. Ęrlo yok. Tuu otirẽt hn ocha dete hnimoho olak ikich otatim olak uje tahmũr olak. ¹⁰Shish olak ewenta erze kuche mihñũwo uje tĩr olak itso uje titim olakni heke shish tikibey olak uje terihĩ ishirĩt nehe uje kuche mihñũwo tĩr ĩrmo lekitiyo par chibite orhõta kimiji õr iluu om o kimiji ye ompe. ¹¹Tyenij takaashpo shichish. Ye moymlo erze uje ich om uje yesh ahakõrlo par uje nĩhyok yeẽk shuu olak premyo pyerte nehe. ¹²Ese uje shish shiyokõr uje titim olakike ich serz. Tuu wichi dich shi itso uhwirbe uje de Dii Porrosht

ihyuch eheth. Yelij tokolihi Dii Porrosht ihyuch. Tichew Dii Porrosht ir iich tibite ir eeych hn tichew Dii Porrosht ir dit ir iich tibite ir eeych toy. Ese dit wichi Jerusalén ahle uje tãra poõrc uje Dii Porrosht de hn ihnimichihí hnimich nehe. Tichew piich uje ahle toy tibite ire eeych. ¹³Ese uje tẽr uje Porrosht Ichibich tatim daabo ich tyenij shiyokõr uje ire tata.”

Porrosht aabo uje ode dit Laodicea.

¹⁴Atsew asa hutita hn asim erze Porrosht aabo õr bahlut uje de asa iglesya uje de dit Laodicea. Atim ire on: “Wichi ir ahwoso ese uje ich ùru pork shish tata uje ich ùru hn shuu yakaha uje tata. Wichi shiyokõr poõrc hn shiyokõr hnimich hn nos wir kuche uje Porrosht tata. Wichi tata im: ¹⁵Nos tikiraha uje ahakõrlo. Shi olak itso kuche uje oso oho kimiji duhlu o kimiji kiis per olak shi olak itso awit uje otsehnyẽr. Ye olak duhlu hni olak kiis. Tahmũr uje olak kiis o olak duhlu, ¹⁶per ye olak duhlupe hn ye olak kiispe heke titeẽta tuu itso uje tiyuhu olak tuu ãrlo pahwo. ¹⁷Athilo uje ich olak ihĩr deyo hn nos olak ibiyo tokole om hn ye olak nesit latik. Ye erahalope uje nihyok kuche om uje tĩr olak hn nos oso ochuuna uje olak losuhlaabo hn shi olak itso olibo hn shi itso uje amehelo eeyo. ¹⁸Heke takit olak par uje eylo erze oro uje de pahir uje tarĩhi jwekita par tuu ware tokole par uje ye olak koswãha yok heke tuu olak ihĩr deyo. Hn eylo olak ishuwoho pahir uje poro par anãhalo par uje ye apooklo uje oteychim olak pork olak iluu om, hn eylo olak imishiyoho pahir par uje ormihilo olak ile hn erahalo uje Porrosht sehe duhu erahalo. ¹⁹Yok tahirm erze uje tahmũr õr uje sehe oniyokõr uje ye tahmũrpe hn tepyẽr erze uje tahmũr õr uje oshiyokõr uje ye tahmũrpe heke enaha olak par ahakõrlo uje titim olak hn moymlo erze mihnũwo uje ahakõrlo. ²⁰Èrlo yok. Yesh tiyehe pwert uhurrza hn tuu. Kimiji yeẽk nunt pahwoso hn ditsẽr asa pwert uhurrza ich yok tomsaha eheth hn oyaakihye ahir. ²¹Uje yeẽk serz ich tuu sakaha pahir shi itso uje terzni hn tiyakaha Papa ahir. ²²Ese uje tẽr uje Porrosht Ichibich tatim daabo ich tyenij shiyokõr uje ire tata.”—

Ode uje oteeychãha Porrosht wahacha poõrc.

4 ¹Uje nos tichew erze huteke hn takachim poõrc hn tokomo uje uhurrza sitsẽr ire. Tukuntpo ese uje ir ahwoso shi itso uje yeẽk sobita trompeta. Tatim yok im: —Ohĩr lika. Tokowa owa erze kuche uje tyenij tokole nehe.— ²Ichii Porrosht Ichibich hnoy yok seya yok poõrc. Tokomo rey ir ibita dechi poõrc hn yeẽk sakaha eeych. ³Ese uje sakaha debita eeych ich hũre wihĩrt shi itso kojach uje iich otsii jaspe hn shi itso kojach yet uje iich otsii cornalina. Chekshorrza chipeẽsa ire. Asa chekshorrza ir kolort berte itso kojach uje iich otsii esmeralda. ⁴Ese rey ibita wiro tokomo õr ibe yer toy bentikwatro, hn erze uje otsakahachis

wir òr bahuwo uje òr ibiyo iich otsii anciano. Òr ishuwo ich poro hn oyāha doolo uje oro itso uje reye oyāha. ⁵Ese uje sakaha debita eeych ich wirow hūre shi itso yuwebo uje chihit hn ich ihyokōrak dich hn nar. Asa ibita ikich syete nampyon dechi uje hūre. Wir siteēta Porrosht Ichibich uje syete. ⁶Asa ir ibita ikich kucher de uje shi itso lagunta per shi itso pejta hn kojach uje iich otsii cristal. Ese ir ibita wirow kuche ika de kwatro shi itso loshipo. Ir ile de lekitiyo ir eeych. De ir ikich hn de ir nēr. ⁷Nohmet de uje itso ilpiyo, hn uu yet shi itso wōjīt itokohlt, hn uu yet ir ile itso hnakirbich, hn uu yet shi itso agilt uje iyo. ⁸Erze loshipo uje kwatro, kal nohmira ir īhyo seys, hn ir ile de lekitiyo ir eeych. Deeych hn dihlahk shish otsii:

—Eyok Irhīch Porrosht uje ukurbo deyo de, wichi yelij niyokōr uje mīhnik, yelij niyokōr uje mīhnik, yelij niyokōr uje mīhnik. Wichi ichii dekite hn shish de hn shish de nehe.—

⁹Erze kuche uje kwatro uje itso loshipo uje ika wir shish shuu Porrosht ich dich uje sakaha debita eeych hn onina ire. Wichi shish ika. ¹⁰Uje erze kwatro shiyokōr shuu itsorz hn erze uje òr bentikwatro uje òr ibiyo iich otsii anciano wir ocha dete hnīmoho ir ikich hn oteeychāha ire hn ochibite doolo ir ikich uje oro hn otsii:

¹¹—Ōryok Irhīch Porrosht, ich om uje nos oteeychāha owa hn otatim owa uje akirbo de pork owa uje nos ahakōr kuche uje de. Wir de shi pork ahmūr heke ahakōrkite.—

Juan umo asa hutita hn ese Obejīt.

5 ¹Takachim hn tokomo Porrosht uje sakaha debita eeych ich tukumo uje hutita de hmata waächta waa je ochipaāsho. Òr ahwoso de pit hn de pit yet hn oshuu belt otich chishew asa hutita owilo syete par oshuu chishye. ²Tokomo anjel toy uje ir ukurbo deyo de. Wichi chiilehet ich sihnew lahwošo im: —¿Yeēkpo uje ma dich par sehek asa hutita hn shuu kāra erze uje oshiyeru ochīra?— Wichi uje anjel tata. ³Nīhyok yeēk uje de poōrc pwele sehek asa hutita hnii erze uje ode hnīmich hnii erze uje ode hnīmich uut. Nīhyok uje yeēk pwele teychim. ⁴Ich tikiyerh pork nīhyok yeēk uje ma dich par sītser asa hutita hnii uje pwele teychim, ⁵per erze uje òr ibiyo iich otsii anciano yet tatim yok im: —Ye eyerh. Hmeychim, ese uje ir alokot otsii ilpiyot wichi tāra uu ir porokkite Judas lishi hn tāra uu ir porokkite rey David lishi toy, ese uje ir alokot otsii ilpiyot wichi serz heke pwele sītser asa hutita hn shuu asa belta otich kāra uje oshiyeru ochīra syete.—

⁶Tokomo Obejīt uje de pish Porrosht ibita ahir hn erze uje itso loshipo uje kwatro uje ika meytii dukuhlehe asa ir ibita hn erze uje òr ibiyo otsii anciano ode pit. Ese Obejīt shi iyehe wahacha. Uje takachim ire ich shi itso uje yeēk shuukite shuu toy par teeychāha Porrosht. Ir wāpe syete

hn ir ile syete. Wir shi siteēta Porrosht Ichibich uje syete uje Porrosht shuu tīr ĩrmo lekityo. ⁷Ese Obejit hno chishew asa hutita waa je de Porrosht hmata waächta uje sakaha debita eeych. ⁸Uje chishew asa hutitaka hn erze uje itso loshipo uje kwatro uje ika hn erze anciano uje ōr bentikwatro ocha dete hñimoho ese Obejit ikich. Nos wir ōr ire ōr arpa de hn ōr prete de uje oro uje pohir isho de eheth uje aat ehmuuj. Erze uje aat ehmuuj shi siteēta Porrosht aabo ōr ahwoso uje ōr orar otsapur ire. ⁹Wir oteeychi otseēt immo uje ahle otsii:

—Owa ich ma dich heke pwele boy asa hutita uje ochipaāsho hn etsēr erze belt otich uje oshiyeru ochīra shi pork oso oshuu owani hn armista noshi par eshi oso ōr hñitewihī Porrosht ahir. Erze oso nohmiramō otāra nos wir dihipo ōr hñimoho lekityo hn otāra nos owilo uje otseētihī ahwoso kināho kināho ĩrmo lekityo. ¹⁰Owa nos uhu ōr weeta nohmira hn uhu ōr saserdote par eyok ĩrhīch Porrosht ir ibiyo. Tyenij uhu nos otibey oso ĩrmo lekityo nehe.—

¹¹Esee hn tokomo hn tukunt erze anjele ōr ahwoso. Wir ode erze anciano ōr nēr hn erze uje itso loshipo uje kwatro uje chipeēsa ese uje sakaha debita eeych. Erze anjele ich okihñipa, ōr miyone y miyone.

¹²Ochiilehet ich otsihñew lahwošo otsii:

—Ese Obejit oso oshuuni par ishi ōr hñitewihī Porrosht ahir heke ich om uje ir ukurbo de hn ich ĩrhīch dich hn ich eykdeyo hn ukurbosh par shiyokōr kuche. Ich om uje oshuu ir dich hn onarim ire hn oteeychāha ire.—

¹³Esee hn tukunt toy nos wir kuche uje Porrosht shiyokōrkite uje de poōrc hn uje de hñimich hn uje de hñimich uut hn uje de onoot bahluta hn nos wir kuche uje de eheth otata otsii:

—Ese uje sakaha debita eeych hn ese Obejit ich om uje nos oteeychāha ōr hn oshuu ōr deyo hn onarim ōr hn otata uje wir ōr ukurbo deyo de par uje nos oshiyokōr kuche. Ich om uje shish otata oshuu ĩtsorz.—

¹⁴Erze uje itso loshipo uje ika uje kwatro otsii: —Yehe wichi.— Hn erze anciano uje ōr bentikwatro ocha dete hñimoho ōr ikich ese uje dechi debita eeych hn ese Obejit hn oteeychāha ōr.

Belta otich syete de uje chishew hutita.

6 ¹Esee hn takachim hn tokomo ese Obejit uje sitsēr asa belta otich webich osht uje syete de uje oshuu chishew asa hutita hn tukunt wichi nohmet erze uje itso loshipo uje kwatro uje ika chiilehet. Ich ochiilehet lahwošo shi itso uje nar. Tata im: —Erēt.— ²Uje takachim hn tokomo kabehet uje poro. Ese uje iyāha tōhwa pohirpīt par uje tatsikīr. Porrosht ishīm wichi wolt shi itso uje reye oyāha. Hno par uje tatsikīr hn par uje serz.

³Uje ese Obejit sitsēr asa belta otich uje de asa hutita iyehe ese webich osht nēr hn tukunt erze uje itso loshipo uje ika yetpo im: —Erēt.—

⁴Kabehet yet tokolpo uje wihĩrt. Ese uje iyāha wichi kabehet Porrosht ishĩm ir ukurbo par uje ye duhu oso ōr aho kiisihiyepe heke oshuuye oshuu otoy, hn ishĩm ire espada berzak.

⁵Uje ese Obejit sitsēr asa belta otich uje iyehe ese osiyer nēr hn tukunt ese uje itso loshipo yet uje ika tata im: —Erēt.— Takachĩm hn tokomo kabehet uje wis. Ese uje iyāha kabehet balansta de ir hmata. ⁶Erze uje itso loshipo uje ika uje kwatro ōr ehēt tukunt ahwoso uje tata im: —Un kilo erint ir bahat shĩ itso uje yeēk chish obiyo deeych nohmira hn tre kilo erint kinaha uje iich otsii cebada ir bahat shĩ itso uje yeēk chish obiyo deeych nohmira, per ye ahakōr mihnikĩhi erze pohir uje iich otsii olivo uje aseYTE tāra hn ye ahakōr mihnikĩhi erze uva uje wino tāra.—

⁷Uje ese Obejit sitsēr asa belt otich uje iyehe ese tre nēr hn tukunt ese uje itso loshipit yet uje kwatro uje ika tata im: —Erēt.— ⁸Takachĩm hn tokomo kabehet uje kahir. Ese uje iyāha ir iich otsii topik, hn ese uje iyehe nēr wichi uje topo ōr ichibiyo de. Porrosht ishĩm wichi ukurbo uje iich otsii topik par uje shuu oso shuu otoy per tyenij sehek oso shuu ōr wee kwatro hn shĩ pwele shuu ese weeta nohmata shuu ōr chĩra ōr espada hn shuu sewit sēhi ōr nehech otoy hn shuu ōr permo nehech otoy hn shuu loshipo uje de ĩrmo shuu ōr shuu otoy.

⁹Uje ese Obejit sitsēr asa belt otich uje iyehe ese kwatro nēr hn tokomo topo ōr ichibiyo uje odechĩ altar uut. Oso oshuu ōr oshuu otoy shĩ pork otsanimirāha Porrosht ahwoso hn pork otatĩm ōr uje shĩ ye olotiis Cristo heke omasaha par Porrosht aabo. ¹⁰Erze ōr ichibiyo okeytkēr Porrosht ich otsihnew lahwoso otsii: —Irhĩche, owa ich ma dich je nos wir kuche uje ahakōr. Yelij ahakōr uje mihnũwo hn shish ata uje ich ũru. ¿Latik nehe hn eychĩm erze ĩrmo oso uje oshuu ōryok oshuu oyiti hn eyuhu ōryok bahat?— ¹¹Esee hn ishĩm ōr ishũwo uje ich poro hn tatĩm ōr im: —Hap anemlo pikaap nehech oso oshuu Porrosht aabo yewo oshuu otoy uje oshiyokōr ir ibiyo.— Porrosht tatĩm ōr im: —Wir olak deshĩbo uje oso tyenij oshuu ōr oshuu otoy shĩ itso uje oshiyokorĩhi olak.—

¹²Esee hn takachĩm ese Obejit uje sitsēr asa belta otich uje iyehe ese sinko nēr. Takachĩm hn tokomo hnimich uje telerrzpa. Ese deeych ich ye dihitpe, shĩ wis itso ōr ishũwo uje wiso, hn ese shekurko ich wihĩrtpa shĩ itso dikirmista. ¹³Porrzeebe tāra poōrc kayĩhi hnimich. Wir shĩ itso pohir ee uje myent tibichu hn chishit hn shuu ir ee kay. ¹⁴Ese poōrc ich shĩ itso hute uje ochipaāsho nehech nihyok poōrc. Nos wir kojano sihnok laleryo, hn erze hniimo uje awit chĩpeesa nos sihnok laleryo toy. ¹⁵Nos wir reye uje ode nāhu ĩrmo lekitiyo otsakis irehe erze kojano ĩle. Erze uje ōr wĩmshiro ōya ōr hn erze ohyerptoso ōr bahluwo ōya ōr toy hn nos wir ihĩr deyo ōya ōr toy hn erze uje ōr ukurbo deyo hn uje ōr yilo hn erze uje ye ōr yilope ōya ōr toy. ¹⁶Otatĩm erze kojano par kayĩhi ōr pork sehe oduhu lajuwe ōr ire par uje sakis ōr ire pork otola otĩr Porrosht ĩle ikich

uje sakaha debita eeych hn ese Obejit pork Porrosht hn ese Obejit wir ich ochowāha pish ör. ¹⁷Ich terihi ishirīt uje Porrosht sepyēr ör hn nīhyok yeēk pwele ewenta.

Ochibite ir seylta erze israel oso ör une.

7 ¹Esee hn takachim hn tokomo anjele uje ör kwatro uje oyehe myenti wārno uje kwatro par uje otsontew erze myenti par uje ye tibichu ele hñimich hñii uje tibichu onoota bahluta hñii uje tibichu pohir. ²Tokomo anjel yet uje tāra deeych warīch. Wichī tōhwa Porrosht seylta. Porrosht wichī ika. Ese anjel tibich ich sihnew tatim erze anjele yewo uje ör kwatro uje Porrosht ishim ör ukurbo par oshiyokör mihnikīhi nāhu ĩrmo hn onoota bahluta. ³Tatim ör im: —Ye ahakörlo mihnikīhi ele hñimich hñii onoota bahluta hñii erze pohir nehech oyibite Porrosht ir seylta ör une erze Porrosht aabo pork wir ir ibiyo.— ⁴Tukunt uje ochibite wir ör yar erze uje ör syento kwarenta y kwatro mil oso uje ör israel oso.

⁵Erze uje otāra ir porokkite Judá wir ör dose mil. Erze uje otāra ir porokkite Rubén wir ör dose mil. Erze uje otāra ir porokkite Gad wir ör dose mil. ⁶Erze uje otāra ir porokkite Aser wir ör dose mil. Erze uje otāra ir porokkite Neftalí wir ör dose mil. Erze uje otāra ir porokkite Manasés wir ör dose mil. ⁷Erze uje otāra ir porokkite Simeón wir ör dose mil. Erze uje otāra ir porokkite Leví wir ör dose mil. Erze uje otāra ir porokkite Isacar wir ör dose mil. ⁸Erze uje otāra ir porokkite Zabulón wir ör dose mil. Erze uje otāra ir porokkite José wir ör dose mil. Erze uje otāra ir porokkite Benjamín wir ör dose mil.

Oso oyehe Porrosht ile ikich nehe.

⁹Esee hn takachim hn tokomo oso ich okihnipa. Nīhyok uje yeēk pwele tiskēr ör. Nos otāra uu dihipo ör hñimoho lekítiyo hn otāra erze owilo uje otseēt ahwoso kināho kināho ĩrmo lekítiyo. Wir oyehetihi Porrosht ile ikich hn ese Obejit. Wir oyāha lasuwo poro hn nos otōhwa hīr ihyo. ¹⁰Nos wir ör ire otibich ich otsihnew otsii:

—Porrosht uje sakaha debita eeych hn ese Obejit wir uje otsosir öryok hn oshim öryok ese ikirīt uje yelij nihna ire.—

¹¹Nos wir anjele oyehe ochipeēsa Porrosht uje sakaha debita eeych hn erze anciano hn erze uje itso loshipo uje ika hn erze anjele ocha dete hñimo nehech ör une terihi hñimich hn oteeychāha Porrosht ¹²otsii:

—Yehe wichī, sehe oyuhu nos oso shish oteeychāha Porrosht hn onarim ire. Wichī ich eykdeyo hn nos tyenij onina ire hn oduhu ire dich. Wichī ich ukurbo deyo de hn ukurbo de par shiyokör kuche. Sehe oyuhu nos shish otata oduhu ilorz. Ich oyahmūr uje itsorz.— Wir uje anjele otata.

¹³Esee hn erze anciano ör yet tatim yok im: —¿Yeniipo erze uje oyāha lasuwo poro hn otāra iraāpo?— ¹⁴Titim ire too: —Irhiche, owa

eraha.— Ese anciano tatim yok im: —Wir uje otokolihí erze mihñũwo pisho uje tĩr nãhu ĩrmo. Wir uje ye olotiis ese Obejĩt heke ich ōr ishũwo poro pork wichĩ ir armista ishĩ ōr hñitewkite hn churhũ ōr aho. ¹⁵Heke ode Porrosht ile ikich uje sakaha debĩta eeych. Deeych hn dñhlak shish oshiyokŕ Porrosht ĩbiyoho templo eheth. Porrosht uje sakaha debĩta eeych wichĩ uje shuu odebuhu dahir. ¹⁶Ich ye sewĩt nēhi ōrpe hn ye ōr iilo nēhi ōrpe hn ye deeych tew ōrpe hn ye onuunape uje duhlu ¹⁷pork ese Obejĩt uje de Porrosht ĩbita ikich wichĩ uje tĩbey ōr shĩ itso uje tĩbey obejĩ. Wichĩ tyenij hnoy ōr seya ōr awĩt par uje oho. Ese awĩt wichĩ uje ishĩm ōr ĩkĩrĩt uje yelij nĩhna ire hn Porrosht nos churhũ ōr ilote shuu kako.— Wir uje ese anciano tatim yok.

Ese Obejĩt sĩtsēr asa belta otich uhurzoshĩt.

8 ¹Uje ese Obejĩt sĩtsēr asa belta otich uje iyehe ese seys nēr hn oshuu ĩrmo etich wahacha poŕc nehech terihĩ media ora. ²Uje iyuwe media ora hn tokomo anjele uje ōr syete oyehetihĩ Porrosht ile ikich. Otŕhwa trompetĩ syete hn oshĩm erze anjele trompeta kal ōr nohmĩr nohmĩr.

Anjel tŕhwa kobĩt par sēru kuche.

³Esee hn tokomo anjel yet taãcha hn iyehetihĩ ese altar ikich. Tŕhwa kucherk uje itso kobĩt par otserũhu kuche eheth uje aat ehmuuj. Ese kobĩt pur oro. Nos wir erze Porrosht aabo ōr ahwoso uje ōr orar otsapur Porrosht de wahacha ese altar eeych uje oro uje de Porrosht ikich. Yeēk ishĩm ese anjel erze kuche uje aat ehmuuj ich kihniya hn shuu ĩya erze Porrosht aabo ōr ahwoso uje de altar eeych par uje sēru. ⁴Ese anjel sēru ese uje aat ehmuuj hn ir ĩibich tĩr poŕc Porrosht ile ikich hn erze Porrosht aabo ōr ahwoso uje ōr orar otsapur ire ĩya ese ĩibich. ⁵Ese anjel chishew pichure uje dechĩ altar eeych hn chĩmchaha ese kobĩt eheth uje oro nehech yeno hn tãra chĩbite ele hñimich. Ichii nar, ihyokŕak dich hn ōr ahwoso tãra hn ich hũre itso yuwebo hn hñimich telerrza.

Erze anjele otsobĩta ir trompetĩ.

⁶Esee hn erze anjele uje ōr syete ochĩmit ire par otsobĩta erze trompetĩ.

⁷Ese anjel webich osht sobĩta ir trompeta hn kojano tãra poŕc kayĩhi hñimich. Jwekĩta ĩya hn dĩkĩrmista ĩya toy. Kĩmĩji hñĩmo po tre chĩhi ich wichĩ sēru nohmet hn kĩmĩji pohĩr chĩhi wee tre ich sēru weeta nohmata hn nos sēru erze ĩhñemyo uje berte.

⁸Esee hn anjel yet uje iyehe ese webich osht nēr sobĩta ir trompeta. Otãra kuchērk shĩ itso kojach uje dich uje duhlu hn ir yokacha data. Ochĩbite onoota bahluta eheth. ⁹Kĩmĩji onoota bahluta po tre ich shuu pit nohmet chisãha ire dĩkĩrmista hn nos wir kuche uje de onoota bahluta

kimiji wee tre ich shuu weeta nohmata toy. Kimiji nos wir pohir uje chikãha onoota bahluta wee tre ich sihna asa weeta nohmata.

¹⁰Esee hn ese anjel yet uje iyehe erze osiyer nêr sobita ir trompeta hn porrzeebcha bahluta tãra poõrc kayihi hnimich. Wate itso jwekita waa je ich data. Kimiji nos wir onoo hn nos owilo uje awit tãra hnimich uut wee tre chihi ich kayihi asa weeta nohmata eeych. ¹¹Asa porrzeebcha ir iich otsii chiyok pork ich pur menent. Wate shuu ese awit chiyok heke shuu oso shuu otoy ich okihniya pork ich shuu chiyokpa hn pur menent.

¹²Esee hn ese anjel yet uje iyehe ese tre nêr sobita ir trompeta. Kuchêrk sentii deeych par uje ye dihitpe nehech kwatro ora, hn shekurko itspo ye dihitpe nehech kwatro ora, hn erze porrzeebe itspo ye dihitpe nehech kwatro ora. Uje deeych ich ese deeych ye dihitpe nehech kwatro ora hn uje dihlak shekurko hn porrzeebe ye dihitpe nehech kwatro ora. ¹³Esee hn takachim. Tukunt akilt uje shi iyohochis poõrc pehet hn tibich ich sihnew im: —Ich yarhak par oso, ich yarhak par oso, ich yarhak par erze oso uje ode hnimich nehe uje erze anjele òr tre otsobita erze ir trompeti. Ochimit ire par otsobita.—

9 ¹Esee hn anjel yet uje iyehe erze kwatro nêr sobita ir trompeta hn tokomo porrzeebcha tãra poõrc kayihi hnimich. Asa porrzeebcha wichi anjel uje Porrosht ishìm asa yabe par uje sitsêr ese jotsit ebich uje ye uhurtikish. ²Uje sitsêr ese jotsit ebich hn iibich tokole shi itso kipuut dich uje iibich tokole. Ese kiibich sentii deeych hn chûr lekitiyo. ³Eru tãra ese kiibich hn chûr lekitiyoho hnimich. Porrosht ishìm par uje chichew oso shi itso shekshor. ⁴Porrosht sahirn erze eru par uje ye tew ihnemyo hn pohir ihyo hn kuche yewo uje berte. Shi ishìm par uje ches erze oso uje ye Porrosht seyлта chihi òr unepe. ⁵Ye dosim erze erupe par uje shuu oso shuu otoy, shi shuu òr dospa shi itso uje shekshor ches òr. Sinko mese uje wir tyenij ches òr ⁶heke erze oso ich sehe otoy per ye otope.

⁷Erze eru shi itso kabyuhwo uje onishii par otatskîr hn kuche de ir hu eeyo shi itso òr wolo uje reye oyãha uje oro. Ir ile shi itso oso ⁸hn ir akîrt shi itso timcher òr akîrt hn ir potêre shi itso ilpiyo. ⁹Hn ir yûhurrza etan shi itso pyero hn ir ihyo ich ihyokôrak dich shi itso kabyuhwo uje churz jarleshi hn uushi par uje tatsikîr. ¹⁰Erze eru ir kole shi itso shekshor hn wasosh. Ir woso de ir kole par uje chichew oso hn shuu òr doso nehech terihi sinko mese. ¹¹Erze eru ir bahlut wichi anjel uje tibey ese jotsit uje ye uhurtikish. Ese anjel ir iich otsii Abadón. Abadón wichi hebreo òr ahwos hn ir iich yet otsii Apolión uje griego òr ahwos.

¹²Ich yuwirke ese dosiyo webich osht uje ese akilt tata per yehe osiyer de.

¹³Esee hn anjel uje iyehe ese sinko nêr sobita ir trompeta ichii tukunt òr ahwoso uje tãra ese altar uje oro uje ir wãpe kwatro. Ese altar dechi

Porrosht ile ikich. ¹⁴Erze òr ahwoso uje tãra ese altar tatim ese anjel uje iyehe ese sinko òr nêr uje ir trompeta de, erze òr ahwoso tatim ire im: —Eyuhu erze anjele yewo uje òr kwatro uje ode asa onoota data waa je iich otsii Eufates.— ¹⁵Esee hn ochiyuhu erze anjele òr kwatro. Wir shi odechi oyeem orta, deeych, shekurko hn äyt uje Porrosht chibitkite par oshuu oso oshuu otoy. Kimiji oso òr wee chihi tre ich wir oshuu òr weeta nohmata. ¹⁶Esee hn tukunt uje otata erze ohyerptoso uje oyãha kabyuhwo òr dos syento miyones. ¹⁷Porrosht chowa yok erze kabyuhwo hn erze uje oyãha. Kuche sentii òr irojör uje ir kolor shi itso jwekita hn ir kolor asul itso ese kojach uje iich otsii jacinto hn ir kolor kahir itso asufre. Erze kabyuhwo ir hu shi itso ilpiyo. Jweki tokolihi erze kabyuhwo ir ahwo hn kiibo hn asufre. ¹⁸Erze jweki hn erze kiibo hn asufre uje tokolihi erze kabyuhwo ahwo wir uje shuu erze oso shuu otoy òr weeta nohmata hn iimihi wee otiyer. ¹⁹Erze kabyuhwo ir ukurbo tãra ahwo hn tãra kole. Ir kole shi itso echïre hn ir hu de ir kole toy hn shuu oso chïra ir kole shuu doso. ²⁰Erze oso yewo uje ye erze ohyerptoso oduhu örpe oduhu otoy ye onoymppe erze kuche mihñüwo uje òr ire oshiyokör, hn ye onoymppe uje oteeychãha erze demonyo, hn ye onoymppe uje oteeychãha kojano po uje oshiyokör ochïra oro, plata, bronse, kojano hn tabla. Erze kojano po ye nomo latik, hn ye nuunt latik, hn ye dirkpe. ²¹Erze oso ye onoymppe uje oshuuye oshuu otoy, hn ye onoymppe uje ochii ir merikoho hn ochii ir konsahoho, hn ye onoymppe uje oshiyokör erze kuche mihñüwo uje timcher hn hnakirbo oshiyokörihiye uje ye onöyhi pishye ahirpe, hn ye onoymppe uje otohîr.

Hutita de anjel ir hmata.

10 ¹Esee hn tokomo anjel yet uje ukurbo deyo de uje tãra poörc yesh dal hñimich. Ukuhurrza chipeësa ire hn shekshorrza de ir huta eeych. Ir ile ich hüre shi itso deeych uje chihit hn ir hñite ich shi itso uhwirbe per shi yokacha data. ²Ir hmata hutita de ochipaãsho arpich ijaap. Asa hutita ich ye odihyerupe. Shi isãha. Uje ihñimich ich chibite derza waächta onoota bahluta hn ir hñitita waachjãrrza chibite hñimich. ³Tibich sihnew shi itso ilpiyo uje yerh. Uje tibich itsorz ich nar nehech syete bese. ⁴Ich sehe tichew uje tukunt uje tata per ahwoso tãra poörc tatim yok im: —Ye atha erze uje nar syete tataka hn ye atsew ebite hutita.— ⁵Ese anjel uje tokomo uje iyehetihi wahachaka onoota bahluta eeych hn hñimich eeych wichi seem nahmita waächta. ⁶Hn ese anjel tata Porrosht iich uje yelij nihna ire par uje shuu imeheeych uje ir ahwoso uje tyenij tata ich ùru. Porrosht wichi uje shiyokör poörzkite hn nos wir kuche uje de eheth hn shiyokör hñimich hn nos wir kuche uje de eheth hn shiyokör onoota bahluta hn nos wir kuche uje de eheth. Ese anjel tata im: —Porrosht ye seem osope. ⁷Uje ese anjel yet uje iyehe erze

anjele yewo òr nêr uje òr seys, uje wichi sobita ir trompeta ich tyenij yakaha uje Porrosht tatim uu debiyo profeta poruwo wishkite.— ⁸Esee hn erze òr ahwoso uje tukuntike uje tãra poòrc tatim yokpo im: —Bey asa hutita uje de ese anjel ir hmata uje ir hnitita de onoota bahluta eeych hn ir hnitita yata de hnimich eeych. Asa hutita ich isãha.— ⁹Takaha hn tapur ese anjel too: —Asim yok asa hutita ijaabta.— Ishim yok hn tatim yok im: —Boy hn ew. Uje ew ich tete shi itso reyne per owa eh et tyenij chiyokpa.— ¹⁰Uje tishew asa hutita ijaabta waa je de anjel hmata hn taw ich tete itso reyne per shuu pehet ich chiyokpa. ¹¹Tatim yok im: —Nos tyenij atimpo wir oso uje tyenij tîr òr nehe. Tyenij atimpo wir dihipo kinãho hn erze uje otseêt ahwoso kinãho kinãho îrmo lekitiyo hn tyenij atimpo nos wir òr bahuwo.—

Hnakirbo òr osiyer otatim oso Porrosht ahwoso.

11 ¹Esee hn ishim yok phich uje shi itso òr itilta hn tatim yok im: —Eteëta Porrosht ir templo hn eteëta ese altar hn eskêr erze uje odechi uje oteeychãha Porrosht ²per ye eteëta ese patikit uje chipeësa templo pork Porrosht ishim ese patikit erze dihipo kinãho. Wir tyenij odechi ese dit nehech shekurko kwarantidos hn oshiyokôr mihnuwôho wahacha. Wichi dit uje Porrosht chiihlakite.— ³Porrosht im: —Tuu pîbiyo òr osiyer otatim erze oso òr pahwoso par laalo mil dos syento sesenta. Wir òr ishewo uje oyãha shi itso ponchuko.— ⁴Erze Porrosht ibiyo uje òr osiyer shi òr itso erze pohir olivo uje otiyer hn shi òr itso nampyon uje osiyer uje dechi eyok îrhîch ikich. Wichi uu îrmo oso òr bahlut pisht. ⁵Uje yeëk sehe niyokôr mihnikîhi erze profeta ich jwekita tãra erze profeta òr ahwo hn otsêru wichi oshuu duhlu. Uje yeëk sehe niyokôr mihnikîhi òr ich tyenij toy itsorz. ⁶Erze Porrosht ibiyo uje òr osiyer òr ukurbo de par uje ye oduhu ibikpe par nos wir daalo uje otsanimirãha Porrosht ahwoso. Òr ukurbo depo par ochisãha awit dikirmista. Òr ukurbo depo par oshuu erze kuche mihnuwo kinãho kinãho tîr nãhu îrmo shi uje otsahmûr oshiyokôr. ⁷Uje erze profeta ochimît otsanimirãha Porrosht ahwoso hn ese uje itso loshipît uje tokolîhi jotsit uje ye uhurtikish hôr erze profeta oteye hn wichi serz òr shuu òr shuu otoy. ⁸Im orîhichis dehet uje de dit eh et. Ese dit ich dich. Otsiteëta ese dit oso òr îluu shi itso Sodoma hn Egipto oso òr îluu. Ese dit wichi Jerusalén. Wichi owich uje ochowishîhi erze profeta òr îrhîchkite ochibîte krus eeych. ⁹Nos wir dihipo uje ode îrmo lekitiyo hn erze uje otseêt lahwoso kinãho kinãho shish oteychim erze topo uje òr osiyer nehech terihi daalo tre hn pehet iya. Ye odosim òrpe par uje ochihitsim òr. ¹⁰Nos wir oso uje odebuhu îrmo lekitiyo ich òr aylpa uje erze profeta otoy. Wir ich òr aylpa nehech oshimîhiye kuche pork erze profeta uje òr osiyer shish oshiyokos òr. ¹¹Per uje terihi daalo tre hn pehet ãya Porrosht shuu òr ikpo hn

oyehet. Nos wir uje oteychim òr uje òr ikpo hn oyehet ich otolpa sehok òr ebe. ¹²Ochunt ahwoso uje tãra poõrc ich sihnew tatim erze profeta im: —Ohir liklo.— Erze uje otsitak òr oteychim òr uje odohir otãr poõrc hn omasaha ukuhurrza ehok. ¹³Ichii hnimich telerrza. Kimiji ese dit chihii po dye ich sohmet kay uje hnimich telerrza. Shuu oso otoy òr syete mil, hn erze oso yewo uje ye otopo ich otolpa heke oshuu Porrosht ich dich uje de poõrc. ¹⁴Yuwirke erze dosãryu uje iyehe ese webich osht nãr uje akilt tata hn erze kuche mihnuwo yewo iyehe erze yewo nãr shichish.

Ese anjel uje iyehe erze seys nãr sobita ir trompeta.

¹⁵Esee hn anjel yet uje iyehe erze seys òr nãr sobita ir trompeta, hn ochunt ahwoso wahacha poõrc ich sihnew tata im: —Erze òr bahluwo uje otibey ãrmo lekityo wir tyenij otokole hn eyok ãrhãch hn ir Ijit Cristo omasaha òr owich par òr bahluwoho nãhu ãrmo. Porrosht tyenij shish tibey oso nehe.—

¹⁶Erze uje òr bentikwatro uje òr ibiyo iich otsii anciano wir otsakaha debe Porrosht ile ikich. Ochiyuwa dele hnimich nehech òr une terihii hnimich hn oteychãha Porrosht. ¹⁷Otata otsii: —ãrhãche Porrosht, akirbo deyo de. Oyãship owa. Shish owa dekite nehech ele ahle shish owa de, hn oyãship owa uje amsaha par abey oso ãra akirbo. ¹⁸Erze dihipo kinãho ich otsitak pishii owa per ele ahle ich etak òr. Terihii ishirãt par epiyer erze topo hn asim premyo erze ebiyo profeta poruwo wishii hn erze aabo yewo hn erze uje otola owa. Erze premyo de par nos wir òr ire kimiji òr ijaabo o kimiji òr deyo. Terihii ishirãt par ehna erze oso uje oshiyokõr mihnikãhi nãhu ãrmo.— ¹⁹Esee hn otsitsãr asa Porrosht ir templo waa je de poõrc. Asa templo ehok omo kejunt uje Porrosht ahwoso de ehok hn omo hnimich toy uje hũre itso yuwebo, hn ihyokõrak dich, hn nar, hn hnimich telerrza, hn yuwebo kojano kayihii hnimich uje ich deyo.

Israel oso òr itso timcharrza hn Satanãs itso loshipit.

12 ¹Esee hn tokomo yarta data uje de poõrc. Tokomo timcharrza. Ir ishuwo shi itso deeych uje chihit hn iyehe shekurko eeych. Iyãha dolt uje porrzeebe de dose. Ir wolt shi itso uje reye oyãha. ²Asa timcharrza hmãker. Wate tibich pork chuuna uje ir ijãt tabãta hn doso par shũrha. ³Tokomo kuchãt yet wahacha poõrc itso loshipãt uje ich dich hn wihãrt. Ir hu syete hn ir wãpe dye hn ir wolo syete. Nohmãr nohmãr de kal hu eeyo. Ir wolo itso uje reye oyãha. ⁴Kimiji porrzeebe wee chihii tre ich ese uje itso loshipãt chãra ir kolta shuu weeta nohmata kayihii hnimich. Wichii de asa timcharrza ikich waa je sehe ir ijãt shũrha pork uje ir ijãt shũrha ich sehe tew. ⁵Asa timcharrza ir ijãt shũrha iteãtak. Yeãk hnoy shichish ese ir ijãt seya Porrosht hn ir ibãta. Wichii uje tyenij nos tibey nãhu ãrmo oso nehe hn tyenij sepyãr òr chãra òr pyerãt uje shi itso

pohirkita. ⁶Asa timcharrza hno yuhwo t̄ir wahacha owich uje isa uje Porrosht nishii par ire. Wichi tyenij ishim ir poso par erze daalo mil dos syentos sesenta.

⁷Esee hn ichii oteyehe wahacha pōrc. Miguel h̄or ir anjele hn ese uje itso loshipit h̄or ir anjele oteye, ⁸per ye ōr pwele oderz Miguelp̄e, heke ich n̄ihyok ōr owich wahacha pōrc ⁹hn ot̄ara ese uje itso loshipit. Wichi uu echeēt uje ichii dekite uje iyo yewo otsii dyablo hn Satanás. Wichi uje nos sehn̄ȳer erze oso uje ode ĩrmo lekityo. Ot̄ara ire ochibite hnimich hn ot̄ara erze ir anjele ochibite ōr hnimich toy ōya Satanás. ¹⁰Esee hn tukunt ōr ahwoso wahacha pōrc ich sihnew tata im:

—Ele ahle ich terih̄i uje Porrosht serz ch̄ra lakirbo hn eyok Deych Porrosht tibey eyok. Ele ahle hn Cristo ir ukurbo de pork ot̄ara Satanás uje deeych hn d̄ihlak shish denunsya eyok leshibo wahacha Porrosht ile ikich. Wichi ot̄ara ochibite hnimich. ¹¹Porrosht aabo otserz Satanás shi pork ese Obej̄it ir armista ishi ōr hnitewih̄i Porrosht ahirkite hn pork otatim erze uje ye ōr Porrosht aabo uje wichi shiyok̄or par ōr ire. Ye otolpe par ot̄oy pork ye olotiis Cristope.—

Israel oso oyuhwo.

¹²Esee hn shish ōr ahwoso t̄ara pōrc tata im: —Olak tyenij olak ayla uje olak de pōrc hn olak uje ebuhulo pōrc, per ich yarhakpa par olak uje olak de hnimich hn ode onoota bahluta pork dyablo ihnimich hn t̄ir olak. Ich ches pish delo pork chiraha uje ich yej terih̄i ishirit̄ par t̄ir urhuta bahluta eh̄et nehe.— ¹³Ese uje itso loshipit chuuna uje ot̄ara ochibite hnimich heke hno chukwi asa timcharrza waa je ir ĩjit shurh̄ani iteēt̄ak. ¹⁴Porrosht shiyok̄or shi itso uje ishim asa timcharrza akilt̄ ĩhyo uje ich dich par uje yuhwo hno t̄ir ese owich uje isa par ese uje itso echeēt ye dishew irpe. Porrosht tyenij ishim wate ir poso par tre āyo hn pehet ĩya. ¹⁵Ese uje itso echeēt shuu awit̄ tokolihi lahwo itso onoota pork sehe duhu lajuwe asa timcharrza. ¹⁶Per hnimich takashim asa timcharrza. Iin ese awit̄ uje ese uje itso loshipit shuu tokolihi lahwo shi itso uje sehek lahwo hn iin. ¹⁷⁻¹⁸Heke wichi ich sitak pishi wate timcharrza hn hno sats̄ir erze uje ot̄ara wate. W̄ir uje oshiyok̄or uje Porrosht ahwoso tata hn otatim yewo uje ye olotiis Jesuspe. Ese uje itso loshipit hno iyehetihi wahacha hnimich ukult uje de onoot bahlut wirc.

Loshipit de uje tokolihi onoota bahluta nehe.

13 ¹Esee hn tokomo loshipit uje tokolihi onoota bahluta. Ir hu syete hn ir w̄ape dye. Kal ir w̄ape ich wolo de shi itso uje reye oȳaha hn kal ir hu iich de uje Porrosht sitak. ²Ese loshipit uje tokolihi onoota bahluta uje tokomoko wichi shi itso ĩlpiyo. Ir h̄nite deyo itso ese loshipit uje iich otsii hoso hn ir ahwo shi itso ĩlpiyo. Ese loshipit

uje tokolihi poõrc wichi Satanás. Ishim ese loshipit uje tokolihi awit ir ukurbo hn shuu ire dich par uje tibey oso uje ode írmo lekítiyo. ³Ese loshipit yet uje tokolihi awit ir obich de huta yata uje tyenij shuu toy per ir obich owich ompo, heke nos wir oso uje ode írmo lekítiyo ochishlabe hn òya ire. ⁴Oteeychāha Satanás pork ishim lakirbo ese loshipit hn oteeychāha ese loshipit toy. Otata otsii: —Nihyok yeēk uje ma dich itso ese loshipit uje tokolihi awit hn nīhyok yeēk uje tatsikīr ire hn serz.— ⁵Porrosht ye nontew ese loshipitpe uje tokolihi awit uje ire shi narim ire hn chiyuhu lahwošo mihñūwo hn ye nontew irpe uje masaha par tibey oso nehech shekurko kwarenta y dos ⁶heke wichi chiinehñim Porrosht hn chiinehñim Porrosht ir iich hn chiinehñim Porrosht ir owich, hn chiinehñim erze uje ode poõrc. ⁷Porrosht ye nontew ese loshipitpe uje tatsikīr Porrosht aabo nehech serz òr. Ye nontew irpe uje tibey dihipo uje ode hnimo lekítiyo hn par tibey erze uje otseēt ahwošo kināho kināho írmo lekítiyo. ⁸Nos wir uje ode írmo lekítiyo oteeychāha ire. Nos wir òr ire òr iiyo nihyokīhi asa hutita waa je wir òr iiyo de uje òr ikirīt de uje yelij nihna ire. Ochichew òr iiyo uje ehn yahpaa írmo chihikite. Ese Obejit uje oshuu par tooho osokite wichi ir huto. ⁹Kimiji yeēk nahmūr uje sehe tēr ich tyenij tēr uje titim olak.

¹⁰Erze uje Porrosht chībīte par uje ochishew òr ich tyenij ochishew òr, hn erze uje Porrosht chībīte par uje oshuu òr ochīra òr espada ich tyenij oshuu òr oshuu otoy ochīra òr espada heke Porrosht aabo tyenij òr ewenta erze mihñūwo uje tīr òr hn ye olotiis Porrosht.

Loshipit tokolihi hñimich nehe.

¹¹Esee hn tokomo loshipit yet uje tokolihi hñimich uut. Ir wāpe otiyer de itso obejit hn ir ahwošo shi itso ese loshipit uje tokolihi poõrc. ¹²Ese loshipit uje tokolihi hñimich uut ir ukurbo tāra ese loshipit yet uje tokolihi onoota bahluta. Shi uje de ese loshipit yet ahīr ich ir ukurbo de. Wichi shuu nos oso uje ode nāhu írmo oteeychāha ese loshipit uje tokolihi onoota bahluta uje ir huta obich deni per owich ompo. ¹³Ese loshipit uje tokolihi hñimich uut shiyokōr kuche deyo uje ye latik pwele shiyokōr nehech shuu jwekita tāra poõrc kayīhi hñimich oso òr ile ikich. ¹⁴Porrosht ye nontew irpe par shiyokōr erze yar kihniya shi par uje oso oteychim per shi pwele shiyokōr uje ese loshipit yet uje de ire ahīr par uje sehnyēr oso uje ode írmo lekítiyo. Wichi loshipit shuu ohno oshiyokōr kojach pit shuu seētship ese loshipit uje tokolihi onoota bahluta uje yeēk ihyo hutani chīra espada per ye tope. ¹⁵Porrosht ye nontew ese loshipit uje tokolihi hñimich par uje ishim ese kojach pit ir ihycer par uje chiilehet hn par shuu nos wir erze uje ye oteeychāha ese kojach pit shuu otoy. ¹⁶Ese kojach pit shuu nos ochībīte oso òr yar kimiji ijaabo o kimiji deyo, kimiji ihīr deyo o kimiji losuhlaabo, kimiji erze uje òr yilo hn

erze uje ye òr yilope. Ochibíte òr yarta òr hme waächta o kimiji òr une. ¹⁷Heke nĩhyok uje yeëk tiya kuche hnii uje chiwāha ir kuche shi erze uje òr yar de. Asa yarta wate uu loshipit uje tokolihi onoota bahluta ir iich o kimiji ir numiro uje tata ir iich. ¹⁸Shi yeëk uje eykdeyo pwele shuu deyuwo tisĩr par chiraha hnakirtikihi ese loshipit ir numiro. Ese numiro hnakirbich ir numiro. Ese numirt seys syento sesenta y seys.

Syento kwarenta y kwatro mil oso otseët imno.

14 ¹Esee hn takachim hn tokomo Obejit uje iyehetihi wahacha ese kojach uje iich otsii Sión. Erze uje òr syento kwarenta y kwatro mil ode ire ahir toy. Wir uje ese Obejit ir Deych hn ire òr iiyo de òr une. ²Esee hn tukunt ihyokōrak dich uje tāra poōrc. Wichĩ shi itso uje awit uushi ich ihyokōrak dich hn shi itso uje nar ich jwertpa. Ese ihyokōrt uje tukuntike shi itso uje oso oshuu arpa. ³Wir oteychi otseët imno ahle wahacha Porrosht ile ikich hn erze uje itso loshipo uje ika òr ile ikich toy hn erze uje òr ibiyo iich otsii anciano òr ile ikich toy. Nĩhyok uje yeëk pwele chiraha ese imno uje òr ire otseët, shi erze uje òr syento kwarenta y kwatro mil uje otāra hnimich pork ese Obejit ishi òr hnitewihi Porrosht ahirkite. ⁴Wir uje yelij odishew timcher yēr pork shish otibey ire. Shish ohno òya ese Obejit uje tĩr lekitiyo. Wir uje oshimihi ire Porrosht hn ese Obejit itso jōro webich oso uje oshimihi Porrosht. ⁵Wir yelij otata dekushiĩ hn ye òr kuch mihñuwirsh.

Nāhu uje anjele òr tre otata.

⁶Esee hn tokomo anjel yet uje shi iyohochis poōrc pehet. Hno sanimirāha Porrosht ahwoso tatim nos wir oso uje ode ĩrmo lekitiyo, hn nos wir dihipo hn nos wir uje otseët ahwoso kināho kināho. Tatim òr erze ahwoso oomo uje Porrosht chibite uje ehn yahpaa ĩrmo chihikite. ⁷Ese anjel tata ich sihnew im: —Atililo Porrosht hn olak narim ire pork ich yej terihi ishirĩt par wichĩ sepyēr oso. Eeychāhalo ese uje shiyokōr poōrc hn shiyokōr hnimich hn shiyokōr onoota bahluta hn nos wir owilo uje awit tāra hnimich.—

⁸Esee hn anjel yet iyehe nēr tata im: —Ich terihi ishirĩt uje otsihna ese dīt bahlut Babilonia. Erze dīt oso nos shuu dihipo oshiyokōr uje ich mihñūwo shi itso uje shuu yikich sēhi òr.—

⁹Esee hn anjel yet iyehe erze anjele osiyer òr nēr hn chiilehet ich sihnew tata im: —Uje yeëk teychāha ese loshipit uje tokolihi onoota bahluta hn teychāha ese kojach pit uje seët ire hn shuu chibite ir yarta nenta o kimiji hmata ¹⁰ich Porrosht shuu mihñūwo tĩr ire toy shi itso uje wichĩ chishew wint uje ye latik nōya hn shuu wichĩ ihi. Porrosht ich sitak pishi wichĩ. Tyenij shuu otsēru ire ochĩra jwekita hn asufre wahacha Porrosht anjele hn ese Obejit òr ikich. ¹¹Shish duhlu hn dospa.

Ir iibich tokole hn yelij nihna ire. Yelij tonkiya uje de asa jwekita ehēt. Shish duhlu deeych hn dīhlak. Wir erze uje oteeychāha ese loshipit uje tokolihi onoota hn ese kojach pit uje itso ire hn ese loshipit yarta de ōr. ¹²Porrosht aabo ochiraha uje erze kuche mihñūwo tyenij tirēt nehe heke tyenij ōr ewenta erze kuche mihñūwo uje tīr ōr hn oshiyokōr uje Porrosht ahwoso tata hn ye olotiis Jesús.—

¹³Esee hn tukunt ahwoso uje tāra poōrc tatim yok par uje tichew tuu itsorz im: —Ele ahle nehech terihi erze mihñūwo uhurc nehe erze uje otoy hn ye olotiis eyok Irhīch ich om par ōr ire nehe.— Porrosht Ichibich tata toy im: —Ich ompa par ōr pork otsihna debiyo hn otsakir hn ōr premyo de pork oshiyokōr uje ich om.—

Ochekushu jorōho hñimich nehe.

¹⁴Esee hn takachim hn tokomo ukuhurrza waa je poro. Asa ukuhurrza yeēk sakaha eeych. Tibite uje wichi ese hñakirbich uje tāra poōrzkite. Ir wolt uje iyāha pur oro itso rey ōr wolo hn meshete uje ich watakpa de ir hmata par ochīra jōro. ¹⁵Anjel yet tokolihi asa templo ehēt. Wichi tibich ich sihnew tatim ese uje sakaha ukuhurrza eeych im: —Ahlo erze jōro hn eeshye pork ich terihi ishīrīt. Erze jōro uje de hñimich ich nos icho.— ¹⁶Ese uje sakaha asa ukuhurrza eeych ihyo erze jōro uje de hñimich hn chiishye.

¹⁷Esee hn anjel yet tokolihi asa templo ehēt waa je de poōrc. Wichi tōhwa meshete toy uje ich watakpa par ochīra jōro. ¹⁸Anjel yet uje tibey jwekita uje de altar eeych tokolihi ese altar hn tibich ich sihnew tatim ese anjel yet uje hnoy meshete uje ich watakpa im: —Ahlo erze uva ir ee uje de hñimich pork ich nos icho.— ¹⁹Heke ese anjel ihyo erze jōro ee uje iich otsi uva uje de hñimich hn tāra chibite ir owich uje jotsak par ochiyuhu ir otich. Ese owich shi Porrosht siteēta uje tyenij sepyēr oso nehe. ²⁰Erze uva otarāha hñimichihi wahacha dīt nēr par ochiyuhu otich. Ese ir owich dikirmista tokolihi. Asa armista ich data nehech terihi kabyuhwo ir freno hn terihi tre syento kilometro.

Anjele syete ohnoy kuche mihñūwo.

15 ¹Esee hn tokomo yarta yata waa je ich data hn yarhakpa wahacha poōrc. Tokomo anjele ōr syete uje tyenij ohnoy erze dosīryo deyo uje syete nehe. Erze dosīryo deyo wir ich uhurc uje Porrosht shuu tīr īrmo par shuu ōr eyuwo tīsīr hn oym erze mihñūwo uje oshiyokōr.

²Hn tokomo toy shi itso onoota bahluta per nīhyok ye awitīkish, shi itso pejta hn jwekita de lekityo ehēt. Hn tokomo toy erze uje otserz ese loshipit uje tokolihi onoota bahluta hn ese kojach pit uje shi itso ire. Wir otserz ese loshipit pork ye oduhu odibite ōr yarepe ese ir iich

hnii ir numiro. Wir oyehe asa onoota wirc waa je itso pejta hn oshuu arpa. Porrosht wichi uje ishim ör erze arpa. ³Otseēt imno uje Moisés shiyokörkite. Wichi Porrosht ibik. Ese imno shi eyucha ese Obejit. Otata otsii:

—Öryok İrhīch Porrosht, owa akirbo deyo de hn ahakör kuche deyo uje ich ihirts pisho. Shish ahakör uje ich om hn shish atha uje ich ūru. Owa uu nos dihipo ör rey. ⁴İrhīche, nos tyenij otola owa nehe hn oshuu owa dich. Shi owa uje yelij ahakör uje ich mihñüwo. Nos wir dihipo tyenij otirēt nehe hn oteeychāha owa pork ebite orhōta uje epiyer erze uje oshiyokör uje mihñüwo.—

⁵Esee hn takachim poörc hn tokomo templo waa je otsitsērke. Wichi owich uje Porrosht ir ley de. ⁶Syete anjele otokolihī asa templo ehēt. Wir tyenij ohnoy erze dosīryo uje syete. Wir ich ör ishuwo poro hn hüre hn oshiyeru derhīr ör ihiroso uje oro. ⁷Erze kwatro uje itso loshipo uje ika, yet ishim erze basi nohmīr nohmīr erze anjele. Erze basi oro hn kuche mihñüwo de ehēt uje tāra Porrosht pork wichi sitakpa erze uje oshiyokör mihñüwo. Porrosht wichi shish ika. ⁸Porrosht ich hüre hn ir ukurbo deyo de heke shuu asa templo ehēt ich kiibich dich. Nīhyok uje yeēk masaha asa templo ehēt nehech wir sihna ire erze dosīryo deyo uje erze syete anjele ohnoy.

Basi syete uje kuche mihñüwo de ehēt.

16 ¹Esee hn tukunt ahwoso ich sihnew tāra asa templo ehēt tatim erze anjele uje ör syete im: —Bolilo erze kuche mihñüwo uje de erze basi aho hn orīhilo hñimich eeych pork Porrosht ich sitakpa erze uje oshiyokör mihñüwo. Erze kuche mihñüwo Porrosht shuu tīr ör pork ich sitak pishi ör uje oshiyokör uje mihñüwo.— ²Esee hn anjel webich osht hnoy asa ir basta uje kuche mihñüwo de ehēt hn sorīhi hñimich. Kuche tokolihī oso ör yūhīr uje itso abaha uje ich yarhakpa hn doso pork ese loshipit yarta de ör hn oteeychāha ese kojach pit.

³Esee hn anjel yet uje iyehe ese webich osht nēr hnoy ir basta sorīhi erze kuche mihñüwo asa onoota bahluta heke asa onoota bahluta chisāha ire dikirmista shi itso topo ör armitsi. Nos wir kuche uje de asa onoota ehēt nos toy.

⁴Esee hn anjel yet uje iyehe erze osiyer ör nēr hnoy ir basta uje erze kuche mihñüwo de ehēt hn sorīhi erze onoo hn erze owīlo uje awit tāra hñimich. Nos chisāha ire dikirmista. ⁵Tukunt ese anjel yet uje tibey awit tata im:

—İrhīche Porrosht, yelij ahakör uje mīhnik. Shish owa dekite nehech ele ahle shish owa de. Yelij alehi ahwoso hn yelij aluwe uje epiyer ör uhu itsorz. ⁶Ich om uje eyuhu ör bahat pork uhu wir oho dikirmista itsorz pork erze oso oshuu uu aabo wishi hn erze profeta wishi oshuu otoy hn

õr armitsi noshi.— ⁷Tukunt ahwoso uje tãra ese altar tata im: —Irhĩche Porrosht, owa akirbo deyo de. Ich ũru uje oshiyokõr uje mihñũwo hn ich om uje epiyer õr uhu itsorz.—

⁸Esee hn anjel yet uje iyehe erze tre nẽr sanuwãha erze kuche mihñũwo uje de ir basta eheth ese deeych eeych heke ese deeych ich duhũa itso jwekita hn tew erze oso õr yũhir shuu doso. ⁹Erze oso ich õr yũhir dospa uje deeych duhũa itsorz heke ochinehñim Porrosht ir iich. Porrosht wichi ukurbo deyo de hn nos tibey erze kuche mihñũwo uje tãr õr per ye onoym erze mihñũwope uje õr ire oshiyokõr par uje oshuu Porrosht dich.

¹⁰Esee hn anjel yet uje iyehe erze kwatro nẽr sanuwãha erze kuche mihñũwo uje de ir basta eheth ese loshipit uje tokolihi onoota ir owich uje sakaha par tibey oso. Uje sanuwãha ich shuu dihlel data ese owich uje ire de. Erze oso uje odechi oches narhõ pork ich dospa ¹¹hn ochinehñim Porrosht uje de poõrc pork asa dihlel data hn nos wir kuch mihñũwo uje tãr õr ich dospa hn erze uje ich itso abaha yesh de õr toy, per ye onoympo oshiyokõr erze mihñũwo par uje oshiyokõr erze om uje Porrosht sahmũr.

¹²Esee hn anjel yet uje iyehe erze sinko nẽr sanuwãha erze kuche mihñũwo uje de asa basta eheth asa onoota data waa je iich otsii Éufrates heke asa onoota kako par wir ochikãha erze reye hõr ir ohyerptoso uje otãra deeych warich. ¹³Esee hn takachim hn tokomo woo tre. Nohmata tãra wichi ahwo ese loshipit uje iich otsii Satanás, hn yata tãra wichi loshipit uje tokolihi onoota bahluta hn yata tãra wichi ahwo toy ese loshipit uje tokolihi hñimich. Ese uje tokolihi hñimich wichi profetya uje sehnỹer oso. Erze woo wir ichibiyo mihñũwo. ¹⁴Erze woo uje tokolihi õr ahwo wir demonyo uje oshiyokõr erze uje ye latik pwele shiyokõr. Wir otãr ãrmo lekitiyo par otibii erze reye hn ohyerptoso par uje oshuu otakisho lawich par uje otatskãr pork ich terihi ese deeych uje Porrosht cheeshpo. Wichi ich ukurbo deyo de.

¹⁵Esee hn Jesús tata im: —Ërlo yok. Uje takaashpo nehe ich ye latik diraha shi itso echikit. Ich om par yeek uje iyem yok hn chimit ire hn ye niyokõr uje mihñũwope shi itso uje iyãha lasuwo heke ich ye imeheeychpe hn ye pookpe uje takaashpo nehe.—

¹⁶Esee hn erze reye hõr ir ohyerptoso otakisho lawichihichis ese owich uje hebreo ahwosht otsii Armagedón.

¹⁷Esee hn anjel yet uje iyehe erze seys nẽr sanuwãha erze kuche mihñũwo uje de ir basta eheth poõrc pehet hn ahwoso tãra wahacha templo eheth waa je de poõrc uje Porrosht ibita de. Erze ahwoso tata sihnew im: —Ich uhurzike.— ¹⁸Ich hũre itso yuwebo hn tukunt ahwoso hn nar ich ihyokõrak dich hn hñimich telerrzpa. Yelij telerrza ilorz uje ehn hñakirbo ode hñimich. ¹⁹Ese dit bahlut sehek ire po tre, hn nos wir pwerto uje de erze dihpo õr duwo ãrmo lekitiyo nos kay hn Porrosht

eyucha ese dít bahlut Babilonia par uje sepyēr erze oso uje odechi shi itso uje shuu oho erze kuche uje de basta ehēt uje ich dospa pork ire ich sitak pishi ōr. ²⁰Nos wir erze hnimo uje onoota bahluta chipeēsa yaka hn awit sajuwe, hn nos wir erze kojano deyo ihnimich nehech nīhyok. ²¹Kojano uje ibik ich īya uje tāra poōrc kayihi erze oso ōr eeyo. Erze kojano wir deyo. Iyuwe kwarenta kilo kal nohmira heke erze oso ochinehnm Porrosht uje kojano kayihi ōr eeyo pork ich yarhakpa.

Dit bahlut ich itso timcharrza yitoro.

17 ¹Esee hn erze anjele uje ōr syete uje ōr basi de, yet tatim yok im: —Erēt. Tokowa owa ese dít uje itso timcharrza yitoro uje Porrosht tyenij shuu kuche mihnūwo tīr ire pork shiyokōr kuche mihnūwo ich kihniya. Wate sakaha awit eeych. ²Erze reye uje ode ir hnimoho lekityo otīr ese dít uje itso timcharrza yitoro par uje oshiyokōr mihnuwōhoye hn erze oso uje ode lekityo otīr wate par oshiyokōr mihnuwōhoye shi itso uje yikich sēhi ōr.— ³Porrosht Ichibich hnoy yok seya yok hnimich uje isa hn tokomo timcharrza iyāha loshipit uje ich wihirt. Ir iyo kihniya de lekityo ire eeych uje Porrosht ye nahmūrpe. Ir hu syete hn ir wāpe dye. ⁴Asa timcharrza ir nerpta kolor lila hn wihir hn kuche de ir eeyo uje oro hn kojano po uje ich ihirtso hn debich hn kojano yewo uje iyo otsii perla. Asa timcharrza basta de ir hmata waa je oro. Kuche mihnūwo uje wate shiyokōrīhi oso de asa ir basta ehēt. ⁵Ir unta iich de uje ye latik diraha. Ir iich tata shuu itsorz: —Ese dít bahlut Babilonia wichi shi itso nos yitoro ōr data. Nos wir kuche mihnūwo uje de nāhu īrmo wate ōr data.— ⁶Tokomo uje asa timcharrza shuu oshuu Porrosht aaboni hn ōr armitsi noshi hōr erze uje otsanimirāha otatim oso Jesús. Ōr armitsi shuu wate shi itso uje yikich sēhi. Uje takachim ich shuu tish pibe pork ye tikiraha keshi latikpo. ⁷Per ese anjel tatim yok im: —¿Inaapo heke as abe? Yok tyenij titim owa asa timcharrza hn ese loshipit uje wate iyāha uje ir hu syete hn ir wāpe dye. ⁸Ese loshipit uje amoko wichi antkite ichii de per ele ahle ich nīhyok. Tyenij tokolihi ese jotsit uje ye uhurtikish nehe hn tīr urhuta bahluta ehēt. Uje ehn Porrosht shiyokōr irmōkite ichii shuu ochichew laabo ōr iyo ochibite asa hutita uje wir ōr iyo de erze uje ōr ikirīt de uje yelij nihna ire. Erze oso uje ye ōr iyo chihpe asa hutita ich ochishlabe uje omo ese loshipit pork antkite de per ele ahle ich nīhyok je deeych yet nehe hn depo. ⁹Yeēk uje eykdeyo tyenij shuu deyuwo tisir par uje chiraha uje siteēta erze uje tyenij titim owa. Erze hu uje syete siteēta erze wārye uje syete uje asa timcharrza sakaha eeych, ¹⁰hn erze hu uje syete siteēta toy erze reye uje ōr syete. Sinko otokite hn sohmet masaha ōr owich hn rey yet tyenij sakaha wichi owich nehe per ye osdeyope uje sakaha par rey. ¹¹Ese loshipit uje antkite de per ele ahle ich nīhyok wichi uje iyehe erze reye uje ōr syete ōr nēr.

Wichi uje tãra erze syete hn tyenij tîr urhuta bahluta ehete nehe. ¹²Erze wãpe uje dye uje eychimike wir reye uje òr dye. Yahpaa omasahape par reye per uje omasaha nehe ich shi ìhirle otokolpo kimiji una ora. Wir omasaha par reye òya ese loshipit. ¹³Erze reye uje òr dye òr eyuwo itsye heke oshim lakirbo ese loshipit. ¹⁴Tyenij otsatsir ese Obejit nehe. Uje oteye hn ese Obejit serz òr pork ire nos wir irhë òr Irhîch hn erze reye òr bahlut toy. Erze uje òya ese Obejit oso otata otsii: “Wir uje Porrosht chiihla òrkite hn wir uje ye olotiis irpe.”—

¹⁵Ese anjel tatim yok im: —Ese awit uje tokomoko uje asa timcharrza yitorra sakaha eeych wir oso uje ode ìrmo lekityo, hn nos wir dihipo hn nos wir uje otseët ahwoso kinãho kinãho. ¹⁶Ese loshipit wãpe uje dye uje tokomoko wir erze dye reye uje òya ese loshipit. Wir otsitak erze dit oso uje òr itso timcharrza yitoro nehe hn nos ohnoy ir kushjãro hn ochiyuhu wate ishuwo. Wir otew wate êro nehe hn otsëru wate oshuu duhlu. ¹⁷Erze reye tyenij oshiyokôr oshuu itsorz nehe pork Porrosht shuu otakisho leyuwo par oshim lakirbo ese loshipit uje tokolihi onoota nehech nos yakaha erze uje Porrosht tata. ¹⁸Asa timcharrza waa je tokomoko siteëta ese dit bahlut uje shuu erze reye uje ode hnimoho lekityo oshiyokôr uje ire sahmür.—

Otsihna ese dit Babilonia nehe.

18 ¹Esee hn tokomo anjel yet uje yesh ihmich tãra poörc. Ir ukurbo deyo de hn hüre chihit hnimich. ²Wichi tibich sihnew im: —Ich otsihna ese dit bahlut Babilonia, ich otsihna. Heke shi demonyo sakahachis hn nos wir ichibiyo mihnüwo sakahachis toy hn chipirme uje yelij otew shiyokôr dewohochis. ³Porrosht shuu otsihna ese dit itsorz pork erze dit oso oshuu nos dihipo oshiyokôr uje ich mihnüwo itso òr. Oshiyokôr shi itso uje shuu oho wint uje mihnik. Erze dit oso oshuu erze reye uje ode ìrmo lekityo oshiyokôr mihnüwo itso òr toy. Erze oso uje odechi dit oshiyokôr mihnüwo par uje otserz hnote ich kihniya heke oshuu wir òr ihîr deyo erze uje ode ìrmo lekityo uje ochiwãha ir kuche uje ich ihîrtso.—

⁴Esee hn tukunt ahwoso uje tãra poörc tata im: —Porrosht sole: “Olak uje olak yok pijo, atokolihilo ese dit par uje ye ahakôrlo erze mihnüwo uje wir oshiyokôr hn par uje ye wir terihi olak erze kuche mihnüwo uje tîr òr uje tepyër òr nehe.” ⁵Erze kuche mihnüwo uje oshiyokôr shi itso uje otsityër kuche ich kihniya nehech terihi poörc. Porrosht eyucha erze òr kuche mihnüwo uje oshiyokôr hn terihi ishîrit par sepyër òr.— ⁶Erze ahwoso uje tukuntike uje tãra poörc tatim Porrosht im: —Epiyer erze dit oso par erze kuche mihnüwo uje oshiyokôrîhiye. Uhu sowe do bese erze kuche mihnüwo uje òr ire oshiyokôr. Erze mihnüwo uje oshiyokôr ich shi itso uje oshuu yewo oho kuche mihnüwo, heke uhu ilo uje wir oho toy do

bese erze uje oshuu yewo oho. ⁷Erze dît oso ich shî itso timcharrza waa je narim ire hn chukutirâha ire kuche ich kihniya heke uhu mihñūwo tîr ire uje ich dospa ich kihniya toy pork etet chiilehet im: “Yok reynta. Ye yok poluupe. Yelij yok dosdarak ilo asa poluuta uje abich toy.” ⁸Shî deeych nohmîra uje erze mihñūwo tîr òr. Ode uje otoy hn ode uje oyerh pork yewo otoy hn ode uje sewit sêhi òr. Deeych yet nehe hn ese dît tyenij duhlu pork eyok Ìrhîch Porrosht ukurbo deyo de. Wichî uje tyenij sepyêr òr.—

⁹Ese dît shî itso timcharrza yitorra hn erze reye uje ode ïrmo lekítiyo ich shî itso uje òya wate par uje oshiyokôr mihnuwôhoye hn wate shuu ochukutirâha ir kuche toy. Heke uje erze reye oteychim ese kiibich uje tîr poôrc uje ese dît duhlu ich oyerh hn òr dosdarak. ¹⁰Tyenij oyehe dukuhla pork otola uje erze mihñūwo uje tîr dît terihî òr toy. Otata otsii:

—Hiye, hiye, ese dît bahlut Babilonia ich ir ukurbo deyo de per ich wantakpa uje ese mihñik tîr ire pork oshiyokôr mihñūwo.—

¹¹Nos wir oso uje ode ïrmo lekítiyo uje ochiwâha ir kuche erze dît oso ich òr dosdarak hn oyerh pork ich nihyok uje yeêk tiya òr kushjâro. ¹²Wir ochiwâha ir oro, plata, hn kojano uje ich ihîrtso hn debich, hn erze kojano yewo uje iich otsii perla. Ochiwâha bortiso uje ich ihîrtso hn bortiso uje kolor lila hn uje seda hn bortiso uje wihîrtso. Ochiwâha nos wir tabla uje aat ehmuuj hn ochiwâha erze kuche uje oshiyokôr ochîra elefante wâpe. Ochiwâha erze kuche uje oshiyokôr ochîra tabla uje ich debichpa hn erze uje oshiyokôr ochîra bronse hn pyerit hn erze uje oshiyokôr ochîra kojano uje iich otsii mármol. ¹³Ochiwâha canela hn yet iich otsii especias hn erze kuche uje aat ehmuuj uje iich otsii incienso, mirra, hn perfume. Ochiwâha wino, aseyte, erint hn trigo. Ochiwâha wôjo, obeje, kabyuhwo, jarleshi nehech ochiwâha oso uje òr yilo.

¹⁴Erze oso otsii: —Ich ihîr pishi erze pohir ee uje otewni per ich ye otewpope, hn nos wir kuche uje otsahmûrpa hn erze kuche uje ich ihîrts pisho uje deni ich ye chihîpo petik nehe pork ich nihyok ese dît.—

¹⁵Erze uje ochiwâha ir kushjarôho erze dît oso ich otserz hnote ich kihniya. Wir shî oyehe dukuhla ese dît uje kuchit mihnt tîr par uje ye terihî òr toy. Wir ich oyerh pork oyêra ese dît hn otata otsii: ¹⁶—Hiye, hiye, ese dît bahlut ich shî itso timcharrza waa je ir ishuwo ich ihîrt pishoni. Ir ishuwo kolor lila hn wihîrtso. Oro de eeyo hn kojano uje ich ihîrtso hn debich hn yewo uje iich otsii perla.

¹⁷Ich ihîrle uje sihna ire ese dît hn nos wir kushjâro ihîrtso uje de etet.— Nos wir pohir ir yinsiro hn erze yewo uje òr pohir de hn erze uje ochishew obiyoho pohir aho hn nos wir erze uje ochiwâha ir kuchehe pohir wir shî oyehe dukuhla ¹⁸hn oteychim ese kiibich uje târa ese dît uje duhlu otibich otsii: —Nihyok dît yet uje itso ese dît bahlut.—

¹⁹Ochukshâha hnîmich ukult dehe pork ich òr dosdarak hn oyerh otsii:

—Hiye, hiye, ese dît uje ich dich. Nos shuu wir òr ihîr deyo erze pohir yinsiro hn ich shi una ora uje otsihna ese dît.— ²⁰Hn erze ahwoso uje târa poôrc tata im: —Olak ujeolak Porrosht aabo hn ujeolak apóstole hn ujeolak profeta ujeolak dechi poôrc tyenijolak ayla uje Porrosht síhna ese dît oso pork oshiyokôr mihnuwôho olakni.—

²¹Esee hn anjel uje ukurbo deyo de chishew kojach uje ich dich hn târa chîbite onoota bahluta hn tata im:

—Ese dît bahlut Babilonia ich tyenij otsihna shichish heke ich ye onomo petik nehe shi itso ese kojach uje tokôraka tîbite onoota bahluta. ²²Ich ye onunt petik nehe uje erze oso oshuu arpa par uje oteeychi hn ich ye onunt uje otsobîta flawta hn trompeta. Ich nîhyok erze uje ochishew obiyo oshiyokôr kuchehe wahacha dît etet nehe, hn ich ye onunt ese kojach ihyokôrtpe uje chukwerh oposo.— ²³Hn ese anjel im: —Ich ye onomo nampîr petik nehe uje chihit ese dît etet, hn ich ye onunt ese ahamich nehe uje ochiileku. Erze oso uje odebuhu ese dît etetni wir ihîr deyo pork otiya ir kuche hn ochiwâha. Nos wir oso uje ode îrmo lekítiyo ochiraha òr, hn erze meriko hn konsaho uje ode ese dît ni nos otsehnyêr oso uje ode îrmo lekítiyo. ²⁴Erze dît oso wir uje oshuu Porrosht ir profeta wishî hn uu Porrosht aabo. Oshuu òr oshuu otoy hn òr armitsî noshî. Oshuu wir toy erze uje ode îrmo lekítiyo.—

19 ¹Esee hn tukunt ahwoso uje târa poôrc itso oso okihniya uje ochiilehet otsii:

—Eeychâhalo eyok Irhîch Porrosht. Wichî ishi oso òr hnitewkite. Ich om uje yeeychâhalo ire. Wichî ukurbo deyo de. ²Uje Porrosht sepyêr erze oso uje oshiyokôr uje ich mihnúwo ich shish shiyokôr uje ich om hn tata uje ich úru. Sepyêr ese dît bahlut. Ese dît shi itso timcharra yitorra. Wate shuu nos oso oshiyokôr uje ich mihnúwo shuu otseêt ire. Porrosht sepyêr ire pork shuu Porrosht aabo wishî shuu òr armitsî noshî.—

³Hn erze uje ode poôrc uje okihniya otîbich toy otsii: —Eeychâhalo eyok Irhîch Porrosht. Ese dît duhlu hn kiibich shish tîr poôrc. Yelij nihna ire.— ⁴Erze bentikwatro uje òr ibiyo iich otsii anciano hn erze uje itso loshipo uje ika uje kwatro ocha dete hnîmo hn oteeychâha Porrosht uje sakaha debîta eeych. Òr ire otsii: —Yehe wichî. Eeychâhalo eyok Irhîch Porrosht.—

⁵Ese Porrosht ir ibîta òr ahwoso târa uje tata im: —Nos wir olak uje olak Porrosht ir ibiyo hn erze uje otola ire kimijî òr ijaabo o kimijî òr deyo, eeychâhalo eyok Irhîch Porrosht.—

Porrosht aabo tyenij otîr ahamich nehe.

⁶Esee hn tukunt òr ahwoso itso oso uje ich okihniya. Òr ahwoso ihyokôrak dich shi itso awît uje uushi hn shi itso uje nar ihyokôrak dich. Wir otsii:

—Eeychãhalo eyok İrhıch Porrosht pork wichi ir ukurbo deyo de. İchii ire nos tibey oso. ⁷Tyenij eyok aylpa hn eyok narim ire hn tyenij yuhulo ire dich pork terihi ese Obejit ir ahamich shi itso uje wichi chiileku hn ir ihyãta chimit ire. ⁸Porrosht ishım őr par uje oyãha lasuwo uje ich ihirts pisho poro hn ich hüre hn ye warırsh.— Erze őr ishıwo uje ich poro shi Porrosht siteęta erze ir aabo őr iluu uje oshiyokőr om.

⁹Ese anjel tatim yok im: —Atsew ebite hutita erze uje titim owa. Ich om par erze uje Porrosht tatim őr par otır ese Obejit ir ahamich. Ese ahamich shi itso uje ese Obejit chiileku.— Tatim yok toy im: —Erze uje titim owaka ich ũru, wir Porrosht ahwoso.— ¹⁰Esee hn tokotsa pite hnimoho ese anjel ikich par tikeeychãha ire per ese anjel tatim yok im: —Ye ahakőr uhu ilorz. Shi yok Porrosht ir ibik itso owa hn shi yok itso eshibo uje ye olotiis uje Jesús tata. Shi eeychãha Porrosht. Erze uje Jesús tata hn erze uje profeta otata wir uje Porrosht İchibich tatim őr.—

Yet tãra poőrç iyãha kabehet poro.

¹¹Esee hn takachım poőrç uje sitsēr ire hn tokomo kabehet uje poro. Ese uje iyãha ese kabehet ir iich otsii shish yakaha uje tata hn shish ũru. Uje sepyēr oso uje oshiyokőr mihnuwo hn uje tatsikır őr ich shish shiyokőr uje ich om. ¹²İr ile eyhi ich hüre shi itso jwekita yokacha, hn erze őr wolo uje reye oyãha wichi iyãha ich kihniya. İr iich de eeych uje nihyok yeęk chiraha, shi ire uje chiraha. ¹³Erze ir ishıwo uje iyãha shi itso uje otsakihı dikirmista eheth hn ochiyuhu. Ese uje iyãha kabehet ir iich otsii Porrosht ahwoso. ¹⁴Ohyerptosoyehe wichi nēr uje otãra poőrç. Wir ich őr ishıwo ye warırsh hn poro. Oyãha kabyuhwo poro. ¹⁵Ese őr bahlut espada tokolihi ir ahwo uje ich watakpa par nos ihyo wir dihipo uje otirēt otãra ĩrmo lekitiyo. Wichi shiyokőr shi itso yeęk uje tarãha uva hnimich hn chiyuhu ir otich pork Porrosht uje ukurbo deyo de ich sitak pishi őr. Wichi tyenij tibey ĩrmo oso nehe hn uje yeęk shiyokőr uje ich mihnik ich sepyēr chıra pyerit itso pohirkita. ¹⁶Ese uje iyãha kabehet iich de ir nerpta eeych hn de itero eeych toy. İr iich otsii wichi uu rey őr bahlut pisht hn erze irhē őr bahlut toy.

¹⁷Esee hn tokomo anjel yet uje iyehetihiichis par deeych chihit. Wichi tibich ich sihnew tibii erze chipirme uje iyohochis poőrç pehet im:

—Erētlo par uje aaklo elilo poso uje Porrosht ishım olak. ¹⁸Tyenij elilo erze reye őr ĩro hn tyenij elilo erze ohyerptosoyehe őr bahlıwo őr ĩro hn erze uje őr ukurbo deyo de hn elilo erze kabyuhwo ĩro hn erze uje oyãha. Tyenij nos elilo wir őr ĩro erze oso kimiji őr yilo o kimiji ye őr yilope, kimiji őr deyo o kimiji őr ijaabo.—

¹⁹Esee hn tokomo ese loshipit uje tokolihi onoota bahluta hōr wir reye hn erze ohyerptosoyehe őr otãra ĩrmo lekitiyo. Wir otakisho lawich par otatskır ese uje iyãha kabehet hōr wir ohyerptosoyehe. ²⁰Uje oteye hn

ochishew ese loshipit uje tokolihi onoota bahluta hn ese profetit uje shiyokōr kuche uje ye latik pwele niyokōr par sehnyēr oso. Shi uje ese loshipit de ire ahir ich pwele shiyokōr shuu itsorz. Shish sehnyēr erze oso uje ese loshipit yarta de ōr hn oteeychāha ese loshipit ir kojach pit uje seēt ire. Ochishew ese loshipit uje tokolihi onoota bahluta hn ese profetit uje sehnyēr oso hn otāra ōr ochimchaha ōr urhuta bahluta ehēt shi ōr ika. Asufre dechi uje duhlu. ²¹Ese uje espada tāra ahwo hn iyāha ese kabehet shuu erze oso yewo chīra ōr ese espada shuu otoy. Nos wir chipirme tew erze oso ōr ěro nehech ir ije yenpa.

Cristo masaha par rey.

20 ¹Esee hn tokomo anjel uje ihmich tāra poōrc. Wichi tōhwa yabe par sitsēr ese jotsit ebich uje ye uhurtikish. Kenent dich de ir hmata. ²Ese anjel chishew ese loshipit. Wichi ese echeēt uje dekite iich otsii dyablo hn Satanás. Shiyeru chīra ese kenent par uje ye tokolpe nehech mil āyo ³hn tāra chimchaha ese jotsit hn shiyeru ebich. Chibite yarta ese jotsit ir uhurra par uje ye oditserpe par uje ye wichi nehnyēr erze oso uje ode ĩrmo lekitiyo par erze mil āyo uje shi sakahachis. Uje terihi mil āyo ich tyenij ochiyuhu ire par daalo arhaabo.

⁴Esee hn tokomo ōr ibe hn erze uje otsakaha eeyo. Porrosht ishim ōr ukurbo par otsepyēr erze uje oshiyokōr mihnuwo. Tokomo wir ōr ichibiyo toy erze uje ochekshehe ōr etibiyoni shi pork ye olotiis uje Jesús tata hn uje Porrosht tata. Wir ye oteeychāha ese loshipitpe uje tokolihi onoota bahluta hnii ese kojach pit uje seēt ire hnii uje ochibite ese loshipit yarta ōr une o kimiji ōr hme. Wir ōr ikpo hn oshiyokōr Cristo ir ibiyo uje Cristo tibey oso nehe nehech mil āyo. ⁵Wichi webich osht uje ōr ikpo, per erze yewo uje ye odiraha Porroshtpe ye ōr ikpope nehech iyuwe erze mil āyo. Erze uje ochiraha Porrosht wir uje ōr ikpo wap. ⁶Ich om par erze uje ōr ikpo wap pork wir Porrosht aabo. Ye otīr urhuta bahlutpe. Uje otāra yeēk ochimchaha urhuta bahluta ehēt otata otsii toypo. Erze Porrosht aabo wir shi Porrosht hn Cristo ōr ibiyo uje iich otsii saserdote par oshiyokōr ōr ibiyo. Wir Cristo ibiyo par otibey oso uje ode ĩrmo lekitiyo ese mil āyo.

Porrosht tyenij sepyēr Satanás nehe.

⁷Esee uje terihi mil āyo ich otsitsēr ese jotsit ebich uje Satanás de. ⁸Tokolihichis par hno tīr ĩrmo lekitiyo par sehnyēr oso. Hno tīr ese hnimich uje iich otsii Gog hn ese hnimich yet uje iich otsii Magog par shuu nos wir oso otakasho lawich par otatskir. Wir ich okihnipa shi ōr itso hnimich ukult uje de onoota bahluta wir. ⁹Nos otāra ir hnimoho lekitiyo otakasho lawich hn ohno otīr Jerusalén uje Porrosht sahmūr. Porrosht aabo odebuhu Jerusalén wiro. Erze oso ochipeesa Porrosht aabo hn ese dit par sehe onihna ōr per jwekita tāra poōrc kayihi ōr eeyo hn

nos òr duhlu. ¹⁰Ese dyablo uje sehnýēr oso ich otāra ochimchaha asa urhuta bahluta ehete uje asufre de. Ochimchaha ese loshipit wapkite uje tokolihi onoota hn ese profeta uje sehnýēr oso. Wir shish odechi deeych hn dihlahk. Ochuuna erze uje ich doso hn ye uhurtikish.

Jwe sepyēr nos wir uje ye òr Porrosht aabope.

¹¹Esee hn tokomo òr ibita data waa je poro. Yeēk sakaha eeych. Ese hnimich hn poōrc ich sihna ire. ¹²Nos tokomo wir topo deyo hn ijaabo oyehe jwe ikich uje sakaha debita eeych. Ese jwe shuu yeēk sehek erze hute, hn sehek hutita yata toy. Wate uje wir òr iiyo de erze uje òr ikirīt de uje yelij nihna ire. Esee hn nos wir kuche uje oso oshiyokōr uje ehn yahpaa otoy ich nos ochichewni ochibite erze hute. Ese jwe shuu otsepyēr òr kal nohmir nohmir par nos wir kuche uje de erze hute pork wir uje oshiyokōrni. ¹³Nos wir uje otoni otokolihi onoota bahluta hn yewo otokolihi hnimich uut hn otokolihi ese topo òr ichibiyo owich. Nos sepyēr òr par erze kuche mihnūwo uje oshiyokōrni. ¹⁴Ese uje shuu oso otoy hn ese owich uje topo òr ichibiyo deni otāra ochimchaha urhuta bahluta ehete. Asa urhuta bahluta iich otsiī toypo. ¹⁵Nos wir uje ye òr iiyo chihi asa hutitape uje wir òr iiyo de erze uje òr ikirīt de uje yelij nihna ire, ich otāra òr ochimchaha òr asa urhuta bahluta ehete.

Juan teychim poōrc ahle hn ĩrmo ahle.

21 ¹Esee hn tokomo poōrc uje ahle hn tokomo ĩrmo uje ahle toy pork uu poōrc webich osht hn hnimich ich nos sihna ire hn asa onoota bahluta ich nīhyok. ²Tokomo dīt uje tāra Porrosht ahir wahacha poōrc hn ihnimich. Ese dīt ye kuche mihnūwo chihi ehetepe. Ir iich otsiī Jerusalén ahle. Wichī ich ihīrtpa shi itso uje onishii timcharrza par chiilabey. ³Tukunt ahwoso uje ich sihnew tāra ese Porrosht ibita tata im: —Ērlo yok. Ele ahle Porrosht ihyuch dechi oso òr ahir hn wichī debuhu òr ahir. Wir Porrosht ir iiso hn wichī uu òr Porrosht. ⁴Wichī nos churhū òr ilote hn ich ye otope. Nīhyok uje òhyiye hn nīhyok uje oyerh hn nīhyok uje doso pork nos wir kuche uje antkite de nihyokīhi wahacha.—

⁵Porrosht uje sakaha debita eeych tata im: —Ērlo yok. Yok ich nos tiyokōr erze kuche ahlo.— Tatim yok toy im: —Atsew ebite hutita pork ahnūwo ahwoso ich ūru hn tyenij yakaha.— ⁶Tatim yok im: —Ich nos timitike. Yok uu webich osht hn uu uhurzoshit shi itso letra a hn zeta. Ese uje iich sēhi tokosim ire awit tuu ihi. Ese awit wichī uje tōhwa òr ikirīt uje yelij nihna ire. Wichī ye bahatikish. ⁷Ese uje serz ich tokosim ire ese premit. Ese premit wichī yok uu ir Porrosht hn ire yok pijo. ⁸Per erze uje otola hn erze uje otsotiis, hn erze uje oshiyokōr uje ye tahmūrpe, hn erze uje oshuu yewo oshuu otoy, hn erze uje ye onōyhi pishye ahirpe, shi omuhuye ahir, hn erze uje otorāhaye, hn erze uje òyhi yēr ahir, hn erze uje òyhiye ahir, hn erze uje

otsahat loshipo, hn erze uje oshim ire loshipo par oshuu sahat ire, hn nos wir meriko, hn erze uje oteeychãha kojano po, hn nos wir erze uje ich òr kushĩyo nos wir òr ire otserz. Òr premyo wichi uje tyenij otĩr urhuta bahluta eheth uje asufre duhlu. Asa urhuta bahluta iich otsii toypo.—

Jerusalén ahle.

⁹Esee hn erze anjele uje òr syete uje òr basi de uje syete uje erze kuche mihnúwo uje syete de aho uje yuwirke uje nos otsorĩhi ĩrmo ese yet tatim yok im: —Erèt. Tokowa owa waa je itso Obejĩt ir ihyãta.— ¹⁰Porrosht Ichibich shuu takachim erze uje anjel tatim yokike. Ese anjel hnoy yok seya yok kojach eeych uje ich dich hn de porĩt hn sowa yok ese dit uje mihnúwo nihyokĩhi eheth uje iich otsii Jerusalén. Tãra Porrosht ahir wahacha poorc hn ihmich. ¹¹Ese dit ich hũre shi itso Porrosht uje hũre hn shi itso kojach uje ich ihĩrt hn debich uje iich otsii jaspe uje pwele oteychim pit itso ese kojach yet uje iich otsii cristal. ¹²Moraylt uje ich berzak chipeesa ese dit. Ese moraylt ir uhír dose hn kal uhír anjel iyehe. Erze uhír israel oso òr poruwo wishi òr iiyo de uje òr dose kal nohmĩr nohmĩr. ¹³Ir uhír tre de deeych warĩch hn tre de norte hn tre de sur hn tre de uje deeych yakaha. ¹⁴Ese moraylt sakaha erze kojano eeyo uje dose. Ese Obejĩt ir apóstole òr iiyo de erze kojano kal nohmĩr nohmĩr.

¹⁵Ese anjel uje keytker yok hnoy oro uje itso phich par siteeta ese dit hn siteeta uhír hn ese moraylt. ¹⁶Ese dit uu ir wiro nos itsye. Ir eheth hn uje berzak ich itsye. Ese anjel siteeta ese dit chĩra ese phich shuu do mil do syento kilometro. Ir eheth hn uje berzak hn porĩt shi itsye. ¹⁷Siteeta ese moraylt toy. Wichi sesenta y sinko metro uje de porĩt. Siteeta chĩra namikit itso hnakirbich meykit. ¹⁸Ese moraylt oshiyokor ochĩra kojach uje iich otsii jaspe. Ese dit pur oro hn shi itso pejta waa je ye warĩsh. ¹⁹Ese moraylt sakaha kojano eeyo. Wir ich ihĩrts pisho hn ich debich. Ese moraylt chipeesa ese dit. Uu kojach webich osht iich otsii jaspe. Ese kojach uje de ese webich osht eeych iich otsii zafiro. Ese kojach yet uje de ese osiyer eeych iich otsii ágata. Ese kojach yet uje de ese tre eeych iich otsii esmeralda. ²⁰Ese kojach yet uje de ese kwatro eeych iich otsii ónice. Ese kojach yet uje de ese sinko eeych iich otsii cornalina. Ese kojach yet uje de ese seys eeych iich otsii crisólito. Ese kojach yet uje de ese syete eeych iich otsii berilo. Ese kojach yet uje de ese ocho eeych iich otsii topacio. Ese kojach yet uje de ese nueve eeych iich otsii crisoprasa. Ese kojach yet uje de ese dye eeych iich otsii jacinto. Ese kojach yet uje de ese onse eeych iich otsii amatista. ²¹Erze ir uhur uje dose oshiyokor ochĩra ese kojach uje iich otsii perla. Kal ir uhír perla nohmĩra. Ese dit eheth dehet de uje ich dich, pur oro hn shi itso pejta waa je ye warĩsh.

²²Nĩhyok ye tokomo templo uje chĩhi dit ehethpe pork ese eyok Irhĩch Porrosht uje ukurbo deyo de wichi templo hn ese Obejĩt. ²³Ese dit ye nesithpe

uje deeych chihit hñii shekurko pork shi Porrosht yokōrt wichi uje chihit hn ese Obejit wichi shi itso nampyon uje de ese dit. ²⁴Ese dit hüre itsorz heke nos chihit wir oso uje ode ĩrmo lekityo hn wir odirkihi ir yokōrt. Erze reye uje ode ĩrmo lekityo ohnoy ir kuche uje ich ihĩrtso otseya ese dit. ²⁵Ese dit ye odihyeru ir uhirpe uje deeych, hn nihyok uje dihlak. ²⁶Nos wir dihipo uje ode ĩrmo lekityo ohnoy ir kuche uje ich ihĩrtso otseya ese dit, ²⁷per nihyok kuche uje ich mihnũwo masaha eheth. Erze uje oshiyokōr uje ich mihnũwo ye omasaha ehethpe hn erze uje ich ōr kushĩyo. Shi wir omasaha erze uje ōr iuyo de asa hutita uje ōr ikirĩt de uje yelij nihna ire. Asa hutita Obejit ir huto.

22 ¹Ese anjel sowa yok asa onoota waa je ich nimpyo shi itso kojach uje iich otsii cristal. Asa onoota tokolihi ese Porrosht hōr ese Obejit ōr ibita hn uushi ²chikaha ese dehet dich eheth. Ir wiro pohir de uje shuu ōr ikirĩt de uje yelij nihna ire. Kal shekurko ir ee de hn erze ir ihyo ich shuu nos oso uje ode ĩrmo lekityo ōr owich om. ³Erze ĩrmo ilaro Porrosht sajir ikiyokite per ese ĩrmo ahle Porrosht ye dajir ikiyope. Porrosht hōr ese Obejit ōr ibita de ese ĩrmo ahle, hn ir ibiyo shish oteeychaha ire. ⁴Wir oteychim Porrosht ile hn ir iich de ōr une. ⁵Ese ĩrmo ahle ich nihyok uje dihlak. Ye ōr nesita nampyonpe hñii deeych par chihit ōr pork eyok ĩrhich Porrosht ir yokōrt chihit ōr. Ich shish nos ōr itso rey hn shish odechi.

Ich yej terihi uje Jesús cheeshpo.

⁶Esee hn anjel tatim yok im: —Erze ahwoso ich ũru hn ich tyenij yakaha. Eyok ĩrhich Porrosht wichi uje shuu erze ir profeta otatim erze oso lahwoskite. Wichi shuu ir anjel sowa laabo erze mihnũwo uje tyenij tĩr ĩrmo shichish nehe.

⁷Jesús sole: “Ĕrlo yok. Tyenij tikirēt shichish. Ich om par erze uje oshiyokōr uje asa hutita tata.”—

⁸Yok Juan. Tukunt erze kuche hn tokomo erze kuche. Uje tukunt hn tokomo erze, ich tokotsa pite hñimoho ese anjel ile ikich par tikeeychaha ire pork sowa yok erze kuche, ⁹per ese anjel tatim yok im: —Ye ahakōr uhu ilorz. Shi yok Porrosht ibik itso owa hn yok itso erze eshibo uje ōr profeta hn yok itso erze uje oshiyokōr uje asa hutita tata. Eeychaha Porrosht.— ¹⁰Hn tatim yok toy im: —Uhu nos odiraha uje asa hutita tata pork ich yej terihi ishirĩt uje erze ahwoso yakaha. ¹¹Moym erze uje ōr iluu mihnũ yakaha ōr par shi oniyokōr uje ich mihnũwo. Moym erze uje oshiyokōr mihnũwo shi ōr itso erze hñakirbo hn timcher uje oshiyokōr mihnũwōhoye par uje shish oshiyokōr oshuu itsorz. Per erze uje oshiyokōr uje ich om ich shish tyenij oshiyokōr uje ich om hn erze uje oshiyokōr uje Porrosht sahmũr ich shish tyenij oshiyokōr uje Porrosht sahmũr.

¹²Jesús sole: “Ĕrlo yok. Tyenij tikirēt shichish hn tokōhwa premyo par tokosim pihiyo shi itso uje otserz nohmĩr nohmĩr. ¹³Yok uu webich osht hn uhurzost shi yok itso letra a hn zeta.

¹⁴Ich om par erze uje oshiyokōr uje Porrosht sahmūr shi itso uje ochūrhu lasuwo par uje ōr pwele otew asa pohorrza ee waa je shuu ōr ikirīt de uje yelij nihna ire hn par uje ochikāha ese moraylt ir uhurrza hn otīr ese dīt ehēt. ¹⁵Nos wir uje oshiyokōr uje ich mīhnūwo ye omasaha ese dīt ahltpē pork ōr ire ode urhuta bahluta ehēt. Wir shi ōr itso poyto. Nos wir meriko hn konsaho ode urhuta bahluta ehēt, hn nos wir erze uje ye onōyhi pishye ahirpe, shi omuhuye ahir, hn erze uje otorāhaye, hn erze uje ōyhi yēr ahir, hn erze uje ōyhiye ahir, hn erze uje otsahat loshipo, hn erze uje oshim ire loshipo par oshuu sahat ire, hn erze uje oshuu yewo oshuu otoy, hn erze uje oteeychāha kojano po, hn nos wir erze uje otsahmūr otsehn̄yēr yewo, hn erze uje otata lekushiī nos ode urhuta bahluta ehēt.

¹⁶Yok Jesús. Tuu yok anjel hno tīr owa par shuu atsew erze ahwoso hn asim erze iglesya. Yok porokkite wichi rey David. Shi yok itso porrzeebcha bahluta waa je deeych huta ich tokole.”— ¹⁷Porrosht aabo wir ōr itso ese Obejit ir ihyāta. Porrosht Ichibich hn erze uje ōr itso Obejit ihyāta otibii otsii: —Erēt.— Ese uje chunt uje yeēk ler asa hutita ich tibii Jesús im: —Erēt.— Ese uje iich sēhi ich tyenij tīrēt hn ese uje sahmūr ich tyenij ihi ese awit uje shuu ōr ikirīt de uje yelij nihna ire. Wichi ye bahatikish.

¹⁸Titim olak nohm̄ir nohm̄ir uje ěntlo uje asa hutita tata uje erze mīhnūwo tyenij tīr īrmo nehe. Kimiji yeēk duhu ahwoso kināho nōya erze Porrosht ahwoso ich erze kuche mīhnūwo uje asa hutita tata uje Porrosht shuu tīr īrmo nehe ich tīr ire toy. ¹⁹Kimiji yeēk diyuhu ahnūwo ahwoso nohm̄iramo uje de ana hutita uje tata uje Porrosht shuu mīhnūwo tyenij tīr īrmo nehe ich ye Porrosht duhu tew erze pohir ee uje shuu ōr ikirīt de uje yelij nihna ire hn ye dosim ire owichpe uje de ese dīt Jerusalén ahle. Ana hutita tata ese dīt hn erze pohir.

²⁰Jesús wichi uje tatim eyok erze kuche hn wichi tata im: —Titim olak uje ich ūru. Tyenij tikirēt shichish.— Titim Jesús too: —Yehe wichi. Ōryok Irhīche Jesús, erēt.— ²¹Sehe tuu eyok Irhīch Jesús nos dosir olak uje olak Porrosht aabo. Shi ahnūwo uje titim olak.